



پشه‌يي

۶ منگل صنف



چاپس سال: ۱۳۹۹ هـ. ش



ملي سرود

دا عزت د هر افغان دی	دا وطن افغانستان دی
هر بچی یې قهرمان دی	کور د سولې کور د تورې
د بلوڅو د ازبکو	دا وطن د ټولو کور دی
د ترکمنو د تاجکو	د پښتون او هزاره وو
پامیریان، نورستانیان	ورسره عرب، گوجر دي
هم ایماق، هم پشه یان	براهوي دي، قزلباش دي
لکه لمر پر شنه آسمان	دا هېواد به تل ځلېږي
لکه زړه وي جاویدان	په سینه کې د آسیا به
وایو الله اکبر وایو الله اکبر	نوم د حق مودی رهبر

بِسْمِ اللَّهِ الرَّحْمَنِ الرَّحِيمِ



مولېنيس وزارتې

پښه يي

۶ منگل صنف

چاپس سال: ۱۳۹۹ هـ. ش.

کتبس مشخصتي

مضمون: پشه‌يي

مؤلفين: تعليمي نصابس پشه‌يي دپارتمنتستا درسي کتابلاينا مؤلفين
ايدت کېکالي: تعليمي نصابس پشه‌يي دپارتمنتستا درسي کتابلاينا مؤلفين
صنف: شمنگل (۶)

متنس جبه: پشه‌يي

انکشاف دېکالا: تعليمي نصابس وشيک او درسي کتابلاينا تأليفس گن رياست
چرگن کېکالا: مولېني وزارتس ارتباط او عامه مولوبنيس رياستي

چاپ سال: ۱۳۹۹ هجري شمسي

ايميل آدرس: curriculum@moe.gov.af

درسي کتابلاينا چاپ، ونټني او لنگنکستا حقي افغانستان اسلامي جمهوريتس مولېني وزارت
پلا محفوظ شي. بازره گورېک او لنگنکي ممنوع سي. سير کنکالي پلا قانوني شارپان با.

مولېني وزيرس پيغمي

اقراً باسم ربك

گني او مهربان الله ﷻ س حمد او شكرستا ادا كېيځس، كه امه آنتې زنده گي بخشويي سې، او پريك او لككس گني نعمت اوداي وټوان كهويا آمان، او الله ﷻ س پچوالا پيغمبر حضرت محمد ﷺ كه الهي پروالا پيغام تي كه (پريك) سې، درود ماكس. كوركم كه چېنې تارا سې، ۱۳۹۷ هجري شمسي سال مولېنيس سال نامېدي مسمي بيك. ميسي خاتري اما بيي بايوي وطنستن لړېني او وړلېنيس نظمي اساسي بدلېني او تحولتนา شاهدي تي؛ لړيكا، ياده كېكالا، كتاب، مكتب، ادارا او والدينس شورا، افغانستان مولېنيس نظمستا شه اساسي عناصر باين گورېگا، كه لړېني او وړلېنيس وشيك او پوراېېني كوچه مهم نقش دارا. انخول مهم گالا كوچه افغانستان مولېني وزارتس دښتلگريس مقام، وطنس لړېني او وړلېنيس نظامستا رشد او وشيك شاپان كوچه اساسي تغييرتนา اچيك كوچه متعهد سې.

ميسي خاتري تعليمي نصابس اصلاح او وشېكي مهم اولويتېلايه اوداي سن. مندو ركم مكتب، مدرسا او جم دولتي او خصوصي تعليمي نهادېلايه كوچه، درسي كتابلاينا محتوا، كيفيت او توزېع آنتې پامپري مولېني وزارتس لمېلاينا سريكه جاي دارا. امه باور داراگس، كه باكيفيت درسي كتاب داريك دي اوږتا، لړېني او وړلېنيس اساسي هدفلايني پوله نه باكامن. اوچېوي هدفلايني پوليك او بكار تعليمي نظام منجه اچيك خاتري، اكالي نسلس وړلېكالي حيثېدي، وطنس چېكه اړخوتلېكالي لړېكالي، استادان او مسلكي مديرنه اوداي بو احترامېدي اېراكم، كه بالكونې درسي كتابلاينا تدریس، او محتواس گړېني كوچه، هيچ ركم كوششي مه پچه كدن، او اي فعال او ديني، ملي او انتقادي تفكر پلا سنهوي نسلس وړلېني كوچه، كوشش كن. هر دواس تعهدس نونگا كېك او مسؤوليت منكس حس پلا، امه نيتهېدي پړنې آنجودن، كه نن دواسې بي بايوي ياده كېكالي وكا اكالا كوچه، پورا پېوا افغانستانس معماران، او جامعاس متمدن او موثر تكاليا تن. مندو ركم بكار او بيي بايوي ياده كېكالي اوداي، كه وطنس ارزشوتي سرماييي آن، اېراكم، تا فرصت اوداي نپا گورن او ياده كنييس پروسا كوچه كنجكاو، زيرك او فعال وانټ گورېكالي پيري، او لړيكالاس احترام پلا، لړيكاالا اوداي بكار او موثر استفادا كن.

آخر كوچه لړېني او وړلېنيس جم مولېكالي او تعليمي نصابس مسلكي همكارنه اوداي، كه امه كتبس لكيك او آمادا كېك كوچه بو كوشش كهويا سن، منيك كاكم، او گن الله ﷻ دربار اوداي مي آنتې امه پاك او انسان جوپېكالي پندې كوچه كاميابيا اېراكم. معياري او پورا پيو مولېنيس نظام او انخول آباد او پورا پيو افغانستان آرزويدي كه خلڪي تانكواك، مولېكالي او آسودا تي.

مولېنيس وزير


دكتور محمد ميرويس بلخي

فهرست

۱	حمد
۵	نعت
۹	بکار خلک بو دوستان داربن
۱۴	بازرس دوسي
۱۹	حشر
۲۳	بکار دهقان
۲۷	ویرمبوس موټپلی
۳۱	مادا او اقتصاد
۳۵	کتاب کو وات منجپکه ایک
۳۹	آيي او تاتیس حقیلی
۴۳	مهمنس حقي
۴۷	شت کدیک او لار انیک
۵۲	جنگله اودای سم نیا گوربک
۵۶	ټوک
۶۰	امه لامبس کسبگري
۶۵	مکرجن شیا لوکا
۶۹	متلېلا
۷۲	امه افغانان آیس
۷۶	اما وطن
۸۱	شاپل
۸۶	گوماڼا
۹۰	بشرس گڼي خدمتگار

۹۴	جرگا
۹۹	وستل
۱۰۴	نعمان ولایت
۱۰۸	رقعا
۱۱۲	همسایاس حقی
۱۱۷	وطن

حمد



هدف:

متنس پريڪ، لڪيڪ او الله ﷻ وحدانيت شره ايمان او تيس امر بنستا اطاعتي شي.

- الله ﷻ قدرته بارايه كو فكر ڪېدا؟
- چي دنيا س خالقي كه آس؟
- انس نس بايشتگري يا كي رضا كوچه شي؟

هر کوشی تېنا دېوای آم خدایا شکر
 روغ صورت پیدا کېوای آم خدایا شکر
 هر نعمتی مېنه آنتې غنیمت سن
 سچا بندا جوپېوای آم خدایا شکر
 هر اندامم تېني روغ پیدا کېوي سن
 نه کولا نه مېوای آم خدایا شکر
 هر عملم تېنه پرکنا تارا سې
 کار تازا، کار جرېوای آم خدایا شکر

شاه محمد (پېننا)

متنس موټي مقصدي:

الله تعالى بو گن ذات آس، چې دنياتيس پيدا کېوي شي او چې مخلوق آنتې
 روزي پولېکالا آس. الله جلّ و علا تانک بندگانې بيې لمانا هدايتي او مچ لمانه
 اودای انسنس دور ننگا بکستا امري کيا او انسنس عزت او ذلتي کېولا الله
 تعالى گرای شي.

فعالیتبلا:

- ياده کټکالي متنې دک که پردن.
- ياده کټکالي متنس اي اي خط زور کنېدې پردن.
- ياده کټکالي چې متنې اوږې کنېدې پردن.

لغتبلا:

اکوړې لغته معنا او جملایه کوچه اچدا.

۱- نعمت ۲- سچا ۳- تارا



۲- اکوړې اوکتني جواب ددا:

- ياده کټکالي اي اي جن اورن او مړېن گه کي پيدا کيکن؟
- دنيا کيس پيدا کېوي شي؟
- اي بندا کوتي کوتي لڼه شره پولېدن گه الله جل جلاله اودای راضي بې؟

۳- ياده کټکالي اکوړې اگته بارايه کدچال بن:



- ياده کټکالي تانک کنه سنا تې شيلينا نامه گوردن او کدن گه کيس پيدا کېوي شي؟
- هر ياده کټکالا الله پاکس اي اي نامه گوردن.
- ياده کټکالي تانک معلومات پلاسّم الله جل جلاله س استوېنيا کدن.

۴- بی بی یادی یاده کیکالی تانک کتابچایه کوچه لکدن:



– یاده کیکالی متنس چارخطی کتاب رویدی تانک کتابچایه کوچه لکدن.

– یاده کیکالی ای وری آنتی دو خط املا کدن.

– یاده کیکالی ای ورپس املی اصلاح کدن.

ارزیابی:

- آیا یاده کیکالی متن بکار پره بیچان؟
- آیا یاده کیکالی متنس املی بکار لکه بیکن؟
- آیا یاده کیکالی الله ﷻ وحدانیت شره اگت که بیچین؟

گوشنگی لام:



بی بی یادی یاده کیکالی الله تعالیس کاو نامه تانک کتابچایه کوچه لکدن او وری دواس صنف کوچه پردن.

نعت



هدف:

- ياده کېکالي حضرت محمد ﷺ س بکار خصوصيتي پېندن او تي درک کدن او متنس بکار پریک او لکیکي شي.
- الله جلّ و علا ی حضرت محمد ﷺ خلکني کوخاتري گړپويی آس؟
 - حضرت محمد ﷺ خلکنا خول شفا عتي کیا؟
 - خول حضرت محمد ﷺ آنتي آخرين پیغمبر کدیاگن؟

حضرت محمد ﷺ

نینه کوچه سردار اما نبی دو جهانہ معلومدار امانبی
پیدا کبویی خلکہ کوچہ بہتر آس ہرجایہ جا آس نامدار اما نبی
یہ جهانہ ہم اول آیک، ہم آخر لہ جهانہ بہ آشکار اما نبی
شفاعت کیا تمامی امتیستا اللہ پورا سیمہ وار اما نبی
مہ شاہ محمد ہم ابراگم شفاعتی بی درک آم گناہکار اما نبی

شاہ محمد (پینا)



متنس موټي مقصدي:

حضرت محمد ﷺ بکار اخلاقه خاتري ﷻ الله خلکني گړپويي آس. تي خلکه پند لړپني خاتري بو تکليف جاني شره وټپويا شن او خلک بکار پنده شارپچين، حضرت محمد ﷺ قيامت دواس کوچه مسلماننا شفاعت کېکاليي آس.

فعاليتېلا:

۱- ياده کېکالي متني دک دورېدی پردن.

- ياده کېکالي متني اوبارا کنېدې پردن.

- ياده کېکالي متني معنا پلا پردن.

۲- اکورې لغته معنا او جملایه يتېدا.

(۱) بهتر (۲) نامدار (۳) آشکار

۳- ياده کېکالي اکورې اگته بارايه کدجال بن:



- اي ياده کېکالا حضرت محمد ﷺ خدمته بارايه گه خلکني کېچين تشریح کدن.

- اي ياده کېکالا تيس بکار خصوصيته بارايه اگت کدن.

- ياده کېکالي کدن گه خول حضرت محمد ﷺ آنتې اولین او آخرین پیغمبر کدیاگن.

۴- تانک کتابچایه کوچه لکدا:



- ياده کېکالي متنس دو جملا تانک کتابچایه کوچه لکن.
- ياده کېکالي متنس چار جملا اي وري آنتې املا کدن او اي وریس املستا اصلاح کدن.
- ياده کېکالي تانک خوشې دې متن کوچای اي لغتې جملايه يتېدن.

ارزیابی:

- آیا ياده کېکالي متن بکار پرچان؟
- آیا ياده کېکالي مشکل لغات ياده که بېچين؟
- آیا ياده کېکالي حضرت محمد ﷺ س صفتي کده بېچين؟

گوشنگې لام:



بی بی یو ياده کېکالي حضرت محمد ﷺ س کاو بی صفتي تانک کتابچایه کوچه لکن او وري دواس صنف کوچه پردن.

له منگل پران

بکار خلک بو دوستان دارپن



هدف:

متنس بکار پریک، لکیک او نونگی لغتنا یاده کېکي او خلکه پلا بکار
سلوکس روحیستا تقویا کېکي شي.

۱- اېمه خلکه پلا کووات سلوک کيدا؟

۲- اېمه تانک مکتب او لامې کوچه دوستان بو دارېدا يا دشمنان؟

۳- يو متل کو معنا دارا؟ «تانک عملې، پنده يارنې»

مي شره امه جمع پېنېمان گه بکار خلکنا دوستني بو تياگن.

اول بايد کدمان گه بکار خلک کوتي آين او کوته اخلاقه بايد انسان تانوک کدي گه خلک تي آنتې بکار کدن.

بکار انسان اوسه آس گه، تانک اسلامي عقيداس پندستانت او راستي دې تعقيب کدي، صادق، عادل او هر دنه انصافس طرفداري تې او مي اودای، وري انساننې تاوان نه پولې. نه جبېدې وري انسان او مسلمانس غيبي کي او جامعا کوچه مادي او معنوي باور دارې.

کودن گه وري خلک، يه عقيدايه بن گه فلاني انسان، امانتکار او هر لّمه کوچه صادق او عادل آس، يو اگت لم لم خلکه دوره چنا او هر جايه، مه آدميس بکار خوی او عادتس استوېنيا با.

انوخل واقعا هم منجه اياگن گه يو آدمي کيس به لثوېي نه تا، خو خلک تيس دوستني تياگن.

بکار اگت یو شې گه هر بنډا کوشش کې گه، مه صفته جانې کوچه پیدا کدن گه دوستان بو او دشمنان کم بن. کاو گه اي شار يا لامې کوچه دوستان بویاگن، معلوم شې گه دشمنان کم بیاگن. بی بایوي یاده کېکالې! اېمنې الله ﷻ توفیق دېچو گه، بکار اخلاقه داریک پلا بو او بکار دوستان پیدا کدا. کودن گه دوستان بو بن، هدف منزل آنتې پولیک هم آسان با او جامعاس خوشبختي او بایشتگریستا سببي بگا.

متنس موټي مقصدي:

هر کي آنتې در کار شې گه خلکه پلا بکار سلوک کې. تانک سلوکې دې دوستنه بو او دشمننه کم کدي. کمې گه خلکه پلا بکار سلوک او بیاري کیاتې، تیس دوستني بو بیاگن او هر کمې تي سختي دواس کوچه کومک کېيکن. که کمې ناکار سلوک داراتې، کودن گه ورېنې ضرورتي پیدا بیک، کمې به تیس پرویی نه کاگن او تل جانستا کېولا احساس کېي.



- ۱- ياده کښکالي متني دککه پردن.
- ياده کښکالي متني ونښتان اوبارا کنډې پردن.
- ياده کښکالي که متنس کوته جايي شره نه موليانتن، لږکالا اودای اوکت کن.



۲- اکورې او کتنې جواب ددا:

- بکار انسان کي آنتې کدن با؟
- اېمه تانک جانې اودای کووات انسان جو پېک اېرېدا؟
 - امانتکاري، صداقت او عدالت کوته انسنس صفتي شي؟
 - کوته بنداس گه دوستني بو تن زندگيا خوشحال تا که خپا؟

۳- ياده کښکالي تانک منجه کدچال بن:



- مي شره اگت کدا گه کاو دوستان دارېدا؟
- دوستنېستو کودن اېمه سمپني آنتې ضرورتي بتيک؟
- اېمه کوته دوستستو پلا کومک کيکو؟
- لامای دوستنه پلا سلوکو کووات شي؟

- مکتب کوچه همصنډنه پلا سلوکو کوروات شي؟

۴- اکوړې خالي جايه مناسب کلمايه دي پوردا:

بکار انسان گه تانک عقيداس تعقيب
کدي طرفداري تي او تاوان نه پولي.
نه جېږدي وري غيبي کي او جامعاً کوچه
..... داري.

اکوړې لغته معنا او جملا جوړېدا:



(۱) عادل (۲) هدف (۳) شت

ارزيابي:

- آيا ياده کېکالي متن سم پړه بېچان؟
- آيا ياده کېکالي متنس املیي لکتا بېکن؟
- آيا ياده کېکالي بو دوستننا روحيي جاني کوچه پيدا که بېکن؟

گوشنگي لام:



ياده کېکالي تانک بکار دوستنه بارايه کاو خط کتابچايه کوچه لکن
او اکالي دواس، صنف کوچه پردن.

بازرس دواسي



هدف:

متنس بکار پریک، لکیک او تانک وطنس اجتماعي او اقتصادي حالتس درک کپکي شې.

- بازار دواس کي آنتې کدن بگا؟
- کودن اېمه بازار دواس کوچه سودا گورېکو؟
- خول هر جایه بازرس دواسي معلوم تگا؟

امه وطنس بو ولایتته او ولسوالې کوچه بازرس دواسي جوپین بگا. بازار دواسه کوچه که چودې کي اوده کومې شی زیات تې، لکنی او که کمې کومې شی آنتې ضرورت دارا تې، تي ارزان ملې دې استه اچي.

کوته دنه گه پېسا نه آیېچ، خلک تانک ضروري شي جنس تبادلا واسطایدې استه اچاینچ. خو کودن که سکا جوپین بیک، تجارت (دېک او گورېک) لمه کوچه بو آسانی منجېکه ایک.

بازار دواس وري ولایتته کوی، لغمان ولایت کوچه به جوپین بگا. نن دواس گه لغمان ولایت کوچه بازرس دوسي شې، شریف الله او تیس تاتیا به گا گورېک خاترې بارزې شاروي آین.

شریف الله س تاتیا پنده، تانک پولستا انتې کدا: کودن گه گا گورېکاتي، امه اکورې کاو کلمایه ضرور پامه کوچه دریاتیا:

گا باید جوان تې، رنگه شونېک تې، چوچواگن او پنه شلېک تې، گایس شینگه چنتي او مسکه شونېک خط داراتي.

شریف الله او تاتیا اگت اگته کوچه بارزې پولینچ، تې اي بو بکار گا (۲۵۰۰۰) وست و پنج هزار افغانیدې گورېچان، کودن گه گوشنگې اینچ، تیس آیه او وري چې گوشنگوالی بوخوشحال بینچ او گا تانک خاص جای کوچه ټنگچان.

متنس موټي مقصدي:

امه بايد تانک وطن رواج او وونايه شره پېنمان، شی لکنکس او شی گورپکس پندستا ياده کمان او کوشش کمان گه تانک پيسايه ايکه ناکار شی شره نه دمان.

۲- اکورې مترادف کلمايه پيدا کدا؟

پيسا، سکا، خريداري، گورپک، احتياج، لنتيچين، جويچن، دیک، گوريک.

اکورې لغتبلایه جملايه کوچه استعمال کدا.

- تجارت

- احتياج

- تجربا



۳- اکورې اوکتني جواب ددا:

- درس کو بارا کوچه شي؟

- اما خلکن بازار دواس کوچه کو لام کاگن؟

- بازار دواس دولت گرای جويچن بگا يا خلکه گرای؟

- پورا زمانايه کوچه گه پيسا نه آينچ، خلک تانک احتياجبلایه کو

رکمېدي حل کېگايينچ؟

- بازرس دواسي معلوم تياگن يا هر دواس بازار دواس تياگن ؟

۴- ياده کېکالي اکورې اوکته جواب ددن او مترادف کلمايه



کتابچايه کوچه لکدن:

- کوته رنگېس گايه سودوري تياگن ؟
- بورېن خلک خول بو تجربا داريانگن ؟
- شريف الله او تيس تاتيا کودن گا گورېک خاترې بازري پيوي
آينچ؟
- اورې جملايه کوچه گه اي شريک شي وجود دارگا سه سوالياس
علامي شي. (?)
- (کوته)، (خول)، (کودن)
- اوروالي اوته کلما شن گه مې اوداي سواليا جوپياگن، مي آنتي جبه
کوچه سواليا جملا مياگن.



۵- اکورې اوکتنې جواب ددا :

- لغمان ولايت کوچه بازرس دواسي جوپين بگا؟
- شيردېکالي گا پيس صفتبلي کوتي شن؟
- شريف الله او تيس تاتستا شيردېکالي گا کاو پيسايدي گوريچان؟

۶- ياده کېکالي اگت کدن:



صنف دو ډلایه شره ونښن بن اي ډلا بازار دواس شره اگت کدن.

دو منگل ډلا شیردېکالي گايې شره اگت کدن.

عام نام: اوته نامې آنتې کدن با گه ايکه عام شی يا عام جای شره دلالت

کيا. اخولي: مېز، مولېکالا، فصل، کتاب.

۷ - خالي جايلايه تانک کتابچايه کوچه مناسب کلمايه دې پوردا.

- نن دواس گه دوسي شې

..... گا گورېک خاترې آين.

- شريف الله س تاتيا کدايیک.

ارزيابی:

- آيا ياده کېکالي متن بکارپړه بېچان؟

- آيا ياده کېکالي متنس املی بکار لکه بېکن؟

- آيا ياده کېکالي وطنس اجتماعي لمبلايه بارايه معلومات استه اچکن؟

گوشنگې لّام:



تانک بېی يا مچ خاطرستو بازار دواس بارايه اي پتا کاغذ شره لکدا

او اکالي دواس صنف کوچه پوردا.

حشر



هدف:

- يادہ کٻکالي متني بکار پرہ اولکھ بادن.
- حشر معناشره مولان او اي ورې پلا سمرنيس احساسي جانې کوچہ پیدا کن.
- اٻمہ حشر کلما پلا اٻلوي آيدا؟
- حشر لامای خلکھ پلا کاو کومک کيا؟
- جبري حشر يا بٻگار کي گالايه او کودن لغو اعلان بيک؟

حشر (انشر) اي گروپ خلکنا اکتو لمې آنتې مېن بگا گه امه وطنه بو سالي دې منا خلکه منجه رواج آيک او تا ابت جا دوام دارا. حشر عموما مختلف شکلي دې موجود شي، پورا دنه کوچه زور دار خلکه گرای زورېدې عملي بگايک. له وخته زور دار خلک زمينداري، جنگل لام، ورگوري او وري حشرېدې شره پولپايڼچ. دولت گني گني قلايه حشرېدې جوپپايڼچ. بو حشره کوچه مادا خاص او مشکل لمة کپگايڼچ او پاک کاري کېولا مادايه گرای شره پولگايک.

جبري حشر امير امان الله خان وخته افغانستان کوچه لغو اعلان يک، خو تي دې منابه اي شکلي دې بېگار شره پولگايک.

نن به حشر امه وطنه موجود شي گه بو زور او جبري شکل نه دارا او خلکنا تانک رضايدې شره پولگا. دهقانان بو لمة اي ورې کومکې دې شره پولپايڼچ گه ابت به دوام دارا او خلکه گرای تيس نامه حشر جېن بوا شي.

دهقانان کتېر (کتاکنکې) حشرېدې شره پولپکڼ، حشر دې اورپا يو لام ممکن نه شي گه شره پولې او مي دې اورپا دهقانان نه بېن کېتا گه نندي تې ورگې سنگې آنتې اچدن. مي خاترې حشر دهقانه ضرورته کوچاي اي گني ضرورت شي.

لاماي خلک گوشينگ جوپک، شلاکاري، گورپس گېنيا، گوم او دزا
کله چوتپک خاترې حشر کاگن.

حشر گه شخصي نپا او شخصي لمې خاترې زورېدې خلکه شره منن نه
بې، بو بکار او خلکه نپا تې لام شي گه جمعي لمپس جمعي نپا خلکه
استه ايگا.

متنس موټي مقصدي:

حشر اي اجتماعي لام شي، حشر گه زورېدې خلکه شره منن نه بې، اي
بکار لام شي. حشر پورا دنې تا ايت جا خلکه منجه رواج شي.
دهقانان بو لمې حشرېدې شره پولپکن.

ياده کپکالپنا فعاليتپلي:



- ۱- ياده کپکالي متني دککه پردن.
- ياده کپکالي متني ونپتان اوړې آوزېدی پردن.
- ياده کپکالي متنس سخت او نونگي لغته پردن.
- متنس کوتي جايه گه ياده کپکالپني جالب شن پردن.

۲- لغتپلا:



اکورې لغته جملايه يتېدا.

- ۱- حشر ۲- کتا ۳- بېگار

۳- ياده کېکالي اکوړې جملايه بارايه کدچال بن:



- ياده کېکالي کدن گه حشر کو آنتې مېن بگا؟
- ياده کېکالي حشرس فايدي کدډن.
- ياده کېکالي کدن گه کوتي خلک حشر آنتې بو ضرورت داريانگن؟
- ياده کېکالي زورېدې حشرس نقصني کدډن.

۴- ياده کېکالي حشرس فايدستا تانک کتابچايه کوچه لکډن.



- ياده کېکالي متنس اي ونهستا تانک خوشې دې اي وري آنتې املا کډن.
- اي وريس املستا سم کډن.
- ياده کېکالي زورېدې حشرس نقصني لکډن.
- ياده کېکالي اي لغت تانک انتخابې دې جملايه يتېډن.

ارزيابي:

- آيا ياده کېکالي متن بکار پرېه بېچان؟
- آيا ياده کېکالي متنس املې لکه بېکن؟
- آيا ياده کېکالي حشرس اهميتي پېنکن؟

گوشنگې لام:



بيى بايوي ياده کېکالي حشر فايدا بارايه پنج جملا تانک کتابچايه کوچه لکن.

بڪار دهقان



هدف:

– ياده ڪٻڪالي متي بڪار پره او لڪه بادن، دهقاني لُمه اهميت او ارزش شره مولان.

– دهقان ڪي آنتي ڪدن بگا؟

– اڀمه لامه ڪه دهقاني ڪيا، نامه گوردا؟

– دهقاني ڪووات لام شي؟

بو دوران منطقايه کوچه دهقاني عنعنوي او تجربوي شکل دارا، مي خاتري گه له جايه کوچه زراعتس ماموريني موجود نه اين گه دهقانه پلا سمرن، دهقانان تانک مولېني او تجربا رويدې، دهقانيس لمه پورا نېکن.

ابت کې بېمان گه مثال طوريدې، خان مير کاکا لمه او تجربا بارايه اوچېني کمان.

خان مير کاکا تل تانک ماله (گا او گو لانگه) بکار ننگا کيې او تېني فصل پلا گانس برابر کيا او تانک دنېدې خوراک دېي، تيس ماله، تل روغ او چاق تياگن او گايه بکار شير او گولنگي بو بکار لام که دېکن.

خان مير کاکا کووات گه بکار مالداري کيا، امېنخول اي بکار دهقان به آس، تيس فصلي، چې دهقانه دې بکار تگا او بو حاصل اودای گورېگا.

تي کنايه کوچه هر فصله مختلف ترکاري کتوا تگا گه تانک گوشنگ پچلېک خاتري اودای لام گورياگن.

کووات گه خان مير کاکا بو سخي آدمي آس، تانک ترکاري کو چای هر دنه، تانوکوارا او همسايه اودای بو خير لشياگن. اېلو مه علت شې گه خان مير کاکاس مالداري او دهقاني کو چای بو خلکني نپا پولگا، خلک تي آنتې تل دعا کاگن گه الله پاک تيس مالستا کوچه برکت

وايگا، تيس هر شي بو بگا او اي آباد دهقان نامېدې خلک پښيکن او بو اعتبار شريي کاگن.

متنس موټي مقصدي:

هر لمې کوچه بايد انسان نظم اودای لّام گورې او هر کوته لمې تانک دنېدې شره پولېدن. کمې گه تانک لمېنستا بکار تنظيم کدن، بو بکار فايدا او حاصل استه اچه بېگا او تل تانک زندگي کوچه خوشحال او خلک اودای راضي تياگن.

فعايتېلا:

- ۱- ياده کېکالي نونگي جملايه معلم صاحب پلا اي جای تکرار کدن.
- ياده کېکالي متني وار وارېدې اوبارا کنېدې پردن.
- صنف کوچه دو جن هوشيار دهقنس فعاليته بارايه اگت کدن.

۲- اکورې لغتېلايه مناسب جملايه کوچه اچدا:

- برکت - تجربا - اعتبار
- ۳- اکورې سوالېليني جواب ددا.
- درس کو بارا کوچه شي؟
- خان مير کاکاس ماله خول بکوتي تياگن؟
- خان مير کاکاس سانگه خول بکار فصل دېگا؟
- اما خلکن زمستان کوچه کو قسم ترکاري اودای استفادا کاگن؟

اوډې جملایه کوچه اي مشترک شی لښېدا گه سه سوالیاس نشانی
 شي (؟) مي درسه کوچه گه (خول) (کدی) (کوقسم) کلمایه لښېدا،
 مه سوالیاس جملیې شن گه کلما آخر کوچه (؟) چېن بگا.

ياده کېکالي کدچال بن:



ياده کېکالي دو ډلایه شره وتن بن هر ډلاس اي، اي جني تانک لامېس
 تکرې دهقان بارايه اگت کن.

۵- خالي جایلايه مناسب کلمایه پلاتانک کتابچايه کوچه پوردا.

- خان ميرکاکا بو آدمي آس ترکاري

کوچای تانو کوارا او اودای

..... لشيانگن.

ارزیابی:

- آیا ياده کېکالي متې بکار پرېه بېکن؟
- آیا ياده کېکالي متنس املستا لکه بېکن؟
- آیا کېکالي دهقاني لمه شره مولېکن؟

گوشنگې لام:

- تانک لامېس بکار دهقان بارايه اي مقالا لکدا گه چار خط اودای
 کم نه تې او اکالي دواس صنف کوچه پرېدا.

ویرمبوس موټپلی



هدف:

متنس پریک، لکیک او مېوا والا موټنا اهمیتستا پینکي شې.

- ویرمبو کووات مېوا شې؟

- اېمه وطنه ویرمبو موټ شن؟

- ویرمبو کوته کوته جایه کوچه لبن بیاگن؟

ویرمبو امه وطنې مېوايه کوچای، اي مېوا شې گه تازا او سسوا ابن بگا.

امه وطنه، ویرمبوينا موټه او له جایه کوچه بیاگن گه هاویي شدال، واش

او وایگن کوچیي بو ټي او ورگ بو دارگاتي.

ویرمبوینا موتهیلی بو بکار طبیعت جوپیگا او مه مېواس جنگلي، پشه‌یی
منطقا اخول: اله سای، شتل، الینگار، الیشنگ، نور درا، واما گل،
شلت، آرېت، شماش، چلس او وري جایه کوچه موجود شن، گه خلک
اودای بو حاصل گوریاگن.

ویرمبو ویندې مېوا شې، ویندې سوري دې پچا او میزان مایه خلک
کرکه اودای ډیپیکن، تیس اول والا پوستستا دور کېکن او گر سوري
آنتې واییکن.

کودن گه سوسینچ، گر بارزه لکنیکن.

ویرمبو دو قسم شن:

۱- چغزي او نرم

۲- متاق او ککري ویرمبو.

خلک چغزي ویرمبویه اېک خاتري یتیکن. ویرمبو صحت آنتې بو فایدا
دارا او آشپس چربستا کم کېي.

متاق یا بېکار ویرمبویه شره کېولا بالکول اخلیک کوچه او دای لَام
گوریاگن.

کوات گه ویرمبویه اودای خلک فایدا گوریاگن، امېمخول تیس کرکي
به بو استفاداس وړي شن.

پورې گه دنده او نجک خاتري برس او کریم یاو رواج نه آییک، خلک
ویرمبو کرکس، پتا او پوستې اودای لَام گورېگاینچ. یو پوست دنداسا
نامېدې یاده بگا، دنداسا دنده شلېک او دورپس بویستا منجای نیبي.

ویرمبو کړکس لوړکي بو اصيل او بکار شن او تشان اودای بو بکار
سامان جوپيگا.

متن مو تي مقصدي:

ویرمبو کروات مېوا شي؟ امه وطنه کوته جایه کوچه لېن بگا؟
ویرمبو او تیس مو تېنستا اودای کو لّام کورېن بگا؟
ویرمبوس اېکي صحت آنتې کو فايدا دارگا؟

فعاليتېلا:



- اکورې او کتنې جواب ددا.
- درس کو بارايه شي؟
- ویرمبوس مو تېلی چودې بو شن؟
- ویرمبو کاو قسم شن؟
- ویرمبو موته اودای کو شی جوپین بیاگن؟
- ویرمبوس مغزي انسان آنتې کو فايدا دارگا؟
- ویرمبويه میزان مایه کوچه اما خلکن موته اودای ډیپیکن.
- جملا آخر کوچه (.) دېوا شي نقطا جملاس پورا بکستا معنی دېگا.

اکورې لغتبلایه معنا او مناسب جملايه کوچه استعمال کدا:



- شدال - چغزي

ياده کېکالي درسېس اول پږگرافي اي وري آتې املا کدډن:



- ياده کېکالي اي وريس املستا غلطيا انشېدن.
- ياده کېکالي دو لغتيلايه تانک خوشېدې انتخاب کدډ او نوبت پلا تانک منجه جملايه کوچه اچدډ.

ياده کېکالي اکورې جملايه شره اگت کدډن:



- ياده کېکالي ويرمبو موته بارايه نوبت پلا اگت کن.
- ياده کېکالي دو ډلا شره ونتن بن، اي ډلا ويرمبوينا صحي نپيى او وري ډلا ويرمبوينا پيدا بکستا منطقايه شره بحث کن گر نمايندگي دې هر ډلاس اي اي جني، صنف پوره تستي او تانک نظرستا کدډن.
- کوتي ويرمبويدې گه بالکول اخليک کاگن ته اخلکنا نامستا گوردا.

ارزيابي:

- آيا ياده کېکالي متني بکار پره بپيکن؟
- آيا ياده کېکالي متنس املپى لکه بپيکن؟
- آيا ياده کېکالي ويرمبوس اهميتى درک کېکن؟

گوشنگې لام:



- ياده کېکالي ته کړکنا نامستا لکدډ گه مېوا دياگن.
- ياده کېکالي ويرمبويه بارايه که وري بو معلومات داراتن تانک کتابچايه کوچه لکدډ او وري دواس صنف کوچه پږدډ.

مادا او اقتصاد



هدف:

ياده كېكالي اقتصاد او جامعا كوچه ماداينا اهميتي پېندن، متني بكار پړه او لكه بادن.

- اېمه جايه مادا گوشينگ دې كنا كوتي وظيفايه شره پولپيكن؟
- اېمه زيښني كو خاترې احترام كيدا ؟
- زيپ اولاد تربيا كوچه كو كو لمبلا كاگن ؟

كه كم كوى پري كمان، جامعا كوچه ور كه دې زيپ بو لام كاگن. مادا هم گوشنگي لمه شره پولپيكن، هم اولاد تربيا كاگن او هم ور كه پلا گوشينگ دې كنا بو لمبلايه كوچه اكترو آين. شاره كوچاى بو مادايه مكتب پريچان او سواد دارياگن. ته مادا مكتبه كوچه لړپكالي، شفاخانايه كوچه ډاكتر او نرس او دولتي ادارايه

کوچه مامور او پيادا حیثېدې لّام کاگن او تانک گوشینگ ورگه پلا سم اقتصادي مشکل حل کېک خاترې کوشش کاگن.

اطرافي او لامای مادايه گه تېنې مکتب او پرنیس شرايطي جوپوي نه اینچ او سواد ياده کې نه بیکن، ته به گوشینگ لّمی او اولاد شره پري پلا سم، دورای لّمه کوچه به ورگه پلا کندول به کندول وانت گوریاگن. گوشینگ او اولاد زندگي پورا پیک خاترې اي اندازا روپی استه اچیاگن.

دورار او دار منطقايه کوچه مادا ورگه پلا سنگه شره لّام کاگن. قلبا، فصلس ننگا کېکي او هاډي چوتپک کوچه وانت گوریاگن. امېمخول مالداري او تې اوډای حاصل (شیر، جغرات، قروت او شاپل) جوپکس وظيفا به مادايه تانک شره گوريکن.

لامای مادا یو بو لّمه پلا، دارای دار او شا به چوتیاگن، تیس پاک کېک او پچلېکستا مسووليتي به زیبنا شې.

اوته مادا گه پروي نه آن او شاره زندگي کاگن، خوشحاليس جایه شې گه تېنې به بو لّما زمینی مساعد شې. اخول: قالین ویک، خیاطي، خامک سونا، تشاني، دکانداري، تجارت او وري گه مادا مه پندېدې تانک پگال او ورگه پلا اکتو اقتصاد کوچه بو گن آست داریاگن.

متن موټي مقصدي:

کووات گه مادا گوشنگې لّام او بالکوله تربيا کېږي، امېمخول اقتصاد کوچه به آست دارگا. مادا گوشنگې لّمه پلا، کنا تې لّمه کوچه به گن مسووليت ادا کېگا او وطن او گوشينگ اقتصاد پورا پېک خاترې کوشش کېگا.

فعاليتېلا:



- ۱- ياده کېکالي متني دک دورېدې پردن.
- ياده کېکالي متني ونښتان اوبارا کنېدې پردن.
- ياده کېکالي مشکل جملايه تکراري پردن.
- ۲- بي بيوي ياده کېکالي اکورې لغتنا معني کتاب فهرست کوچه لادن او جملايه کوچه يتېدن.



۱- پري ۲- وانپ ۳- پگال

۳- اکورې اوکتني جواب ددا:

- گوشينگ او کنا مادا کوته کوته لّمه شره پولېکن؟
- اوته مادا گه پروي آين، کوته جايه لّام کاگن؟
- لامای مادا کو لّام کاگن؟
- زيپ مالداري اودای کوشی استه اچياگن؟

۴- ياده کېکالي اکورې هدايته بارايه کدچال بن:



- بې بايو ياده کېکالي گوشينگ کوچه مادايه مسووليت بارايه اگت کدن.
- ياده کېکالي دو ډلا بن، اي ډلا زيبنا گوشنگې لمبلی او وري ډلا تېنا کناتي لمه بارايه مشورا کېتا اگت کدن.

۵- تانک کتابچايه کوچه لکدا:



- ياده کېکالي متنس دو خط کتاب رويدې تانک کتابچايه کوچه لکن.
- ياده کېکالي تانک خوشې دې اي جملا اي وري آنتې املا کدن.
- ياده کېکالي اي ورېس املستا سم کدن.
- ياده کېکالي (پري) کلماي جملايه يتېدن.

ارزيابی:

- آيا ياده کېکالي متني بکار پړه بپيکن؟
- آيا ياده کېکالي متنس املبي لکه بپيکن؟
- آيا ياده کېکالي اقتصاد کوچه ماداس رولي درک که بپکن؟

گوشنگې لام:



- بې بايو ياده کېکالي تانک آبي لمه بارايه کاو جملا کتابچايه کوچه لکن او اکالي دواس صنف کوچه پردن.

کتاب کو وات منجېکه ایک



هدف:

ياده کېکالي متنس بکار پریک، لکیک، کتبس اهمیتی او کتاب منجېکه ایک دې پورا لکني بارایه خلکنا مشکلتی پېندن.

۱- آیا پوره زمانایه کتاب آیک؟

۲- پورا خلک لکان کي شره کېگاینچ؟

۳- کتاب ایک پلا خلکنا کاو مشکلي حل بیک؟

پوره زمانایه کتاب نه آیک او خلک تاریخ او قصایه یادي یاده کیاینچ او اکالا نسل آنتې کداینچ، امېمخول، قصا او افسانا پیري پیري اي

نسلي، وري نسل آنتې انتقال بگايښ، کووات گه مه قصا بو زیات بینچ او چې یاده نه درگاینچ، یه دنه خلک انوخل شی فکره بینچ گه مه قصاینا ننگا کېک کوچه کومک کې. خلک نرم شلا شره تېز لوړکې دې نشاني کېگاینچ او تي انگر شره درپاینچ گه سه نشاني بو دني جا باقي دروي تگايچ، حقيقت کوچه اېلومه کتاب لکيکس انجوېکي آیک. خلکه مي خاترې گه تېنا نظري، قصی او تاريخي وره نسل آنتې درن، وري بو کوششېلا کېچين. واره شره لکان، مالنا پوستنستا شره لکان مېنا کوششنا مثالي شن.

(۵۰۰۰) سال پورا مصريان پاپيروس موته پتايه شره لکان کېگاینچ. خوشحالیس اگتي يو گه اول وار چين کوچه کاغذ جوپين بیک، تي دې پتای آلمان کوچه چاپس ماشيني کشف بچ، گه يومه جهنس گن ترقي او پورا پېکس سبيي بیک او کاغذبدي ايت هونا شکلېدي کتاب منجېکه ايك.

متنس موټي مقصدي:

پورا زمانايه کتاب نه آيیک، پوره هوني انسانان تانک فرهنگستا قصايه دې، پوسته، واره شره، شلا او پتايه شره لکان واسطايدي، وره نسل آنتې اوړگاینچ، کودن گه کاغذ او چاپس ماشيني منجېکه ايك، کتبس شکلي به منجېکه ايك.

۱- اکورې کدنا شره عمل کدا:

- ياده کېکالي پنج دقيقا درسي چوپ دورېدې پردن.
- ياده کېکالي جملايه لړېکالا پلا اي جاي تکرار کدن.
- متني اوبارا کنېدی، وار وارېدې پردن.
- ۲- اکورې کلمايه کوچه مترادف کلمايه لادا.
- قديم، پوره هونا، افسانا، رواج، وونا، لکيک، پريک،
- ۱- اکورې لغتيايه جملايه کوچه استعمال کدا.
- پوره هونا - وونا



۳- اکورې اوکتني جواب ددا:

- درس کو بارايه شي؟
- پورا زمانا کوچه خلک کو شره لکيک کېگاييچ؟
- کتاب کودن منجېکه ايک؟
- کاغذ کوتي مملکت کوچه جوپين بيک؟
- چاپس ماشيني چودي کشف بيک؟

۴- چودي که خط کوي شي تي آنتي توجو کدا:

- کاغذ او چاپس ماشيني چودي منجېکه ايک؟
- پوره هوني انسانان لېکيک کو شره کېگاييچ؟
- (چودي، کاو او کو) اته کلما شن که سواليا جويياگن.



۵- اکورې متنس خالي جايلايه مناسب کلمايدي پوردا او تانک کتابچايه کوچه لکدا.

پوره کتاب نه آيک او تاريخ
او قصايه کياینچ اکالا
..... کداینچ.

اکورې جملايه بکار خطېدي تانک کتابچايه کوچه لکدا.
اول وار چين کوچه کاغذ جوپين بيک، تي دې پتای آلمان کوچه
چاپس ماشيني کشف بچ.

ارزيابي:

- آیا ياده کېکالي متني بکار پره بپيکن؟
- آیا ياده کېکالي متنس املیي بکار لکه بپيکن؟
- آیا ياده کېکالي کتاب منچکه اېکس تاريخ شره مولېکن؟

گوشنگې لام:



ياده کېکالي کتاب اهميت بارايه چار سطر مقالا لکن او اکالي دواس
صنف کوچه پردن.

آبي او تاتيس حقبلي



هدف:

ياده کېکالي آبي او تاتيس حقي پېندن. تې اگتې کار جان او احترامې کن. متې بکار پردن او لکدن.

۱- آبي او ببا اېمه شره کاو حق دارياگن؟

۲- اېمه آبي او تاتيس کاو احترامې کېدا؟

۳- اېمه آبي او بباينا زحمتي درک که کېدا؟

آبي او تاتي اولاد شره بو حقبلا دارياگن. اولاد بايد، مه حقه پېندن او تېنا بو عزت او احترامې کن، خول گه اي بو واضح حديث، يه بابتېه کدوا شې.

(جنت آبي او تاتي پايه لېنه شې) کمې گه آبي او تاتيس عزتي کاگن، ته خلک نه دنيايه خوار بياگن او نه آخرته.

امه پروردگاري حکم کيکن گه الله تعالى دې اورتا وري کيس بندگيا مه کدا او آبي او تاتي پلا احسان کدا.

کمي گه آبي ببايه قدر شره مولياگن، تي پوره اف به نه کاگن، مي خاتري گه ميدي آبي او تا تي آنتي تکليف پولا. آبي او تاتي آزار دېکي دې الله پاک ناراض بگا. کووات گه آبي او ببايه بارايه تاکيد بوا شي، امه بايد تخل عمل کمان او تي پوره اف به نه کمان گه تېنا خفگنستا سبي نه بي. آبي او تاتي پوره بايد بو احترامېدې اگت کدمان او تېنا عزتي کمان.

حضرت محمد ﷺ کدا: جب پرتان: (الله پاکس رضي، آبي او تاتي رضا کوچه شي او الله ﷻ س نا رضائتيا آبي او ببايه نا رضائتي کوچه شي). که چودي آبي او تاتي کي اوداي راضي تن، الله ﷻ به راضي آس او که ته ناراض تن، الله ﷻ به ناراض بگا.

که چودي کمي ابرگاتي گه الله پاک اوداي خوشحال او راضي بي، درکار شي گه تانک آبي بباينا عزتي او احترام کي، رضائتستا استه اچدن او تل خوشحال رشدن.

متن موټي مقصدي:

اولاده شره آبي او بباينا کاو حقي شي؟ اولادنا آبي او تاتي پلا سلوکي کووات تي؟ اولاد آبي او تاتېنا حقي کووات جايه کدن؟

- ۱- یاده کپکالي درسي پنج دقيقا دک دوربدي پردن.
- ياده کپکالي درسي لړپکالا پلا اوبارا آوزبدي تکرار کدن.
- ياده کپکالي تانک آبي او تاتي حقبلايه بارايه کاو اگت صنف کوچه کن.

۲- اکورې آيت شريفي پردا:

وَقَضَى رَبُّكَ أَلَّا تَعْبُدُوا إِلَّا إِيَّاهُ وَبِالْوَالِدَيْنِ إِحْسَانًا إِمَّا يَبُلُغَنَّ عِنْدَكَ الْكِبَرَ أَحَدُهُمَا أَوْ كِلَاهُمَا فَلَا تَقُلْ لَهُمَا أَفٍّ وَلَا تَنْهَرْهُمَا وَقُلْ لَهُمَا قَوْلًا كَرِيمًا (الاسراء/۲۳).

جب پرتان: او الله ﷻ ی فیصلا کبوی سې گه: الله دې اورتا وري کيس عبادتي مه کې. او آبي او ببا پلا نيکي کې. اگه تېنه پلا تې اودای ايوانی یا دوکه بوړېني حالته پولیچ، ویی تې آنتې اوف به مه کدې او اوړې اگت سړی مه که او احترامېدي ملتنا اگت که.

۳- اکورې جملايه شره اگت کدا:



صنفس بالکولي چار دلایه شره ونتن بن.

- ای دلا تاتي بارايه اگت کدن.
- دومنگل دلا آبي بارايه اگت کدن.
- لمنگل دلا اولاد بارايه اگت کدن.
- چارمنگل دلا لړپکالا بارايه اگت کدن که لړپکالا تانک ياده کپکالي شره کاو حق دارگا.



۴- اکورې اوکتني جواب ددا:

- درس کو بارايه شي؟
- آبي او تاتيس کاو حقي شن؟
- لږېکالا خواري او زحمت پلا، مکتب بالکوله اودای کو جوپين بياگن؟

۵- کتابچايه کوچه لکدا:



- صنف دو ډلايه شره ونټن بن.
- اول ډلا سدوري خطي دې درس اول هوني له خطه مشق لکدن.
- دومنگل ډلا متنس آخروالي له خطه مشق لکدن، ياده کېکالي تانک منجه خطبلايه اي ورې پلا مقايسا او املاس غلطيا آنشېدن.

ارزيابي:

- ياده کېکالي متن بکار پرېه بېچان؟
- آيا ياده کېکالي متن بکار خطبدي لکه بېچان؟
- آيا ياده کېکالي آبي او تاتي حقبلايه بارايه اگت کده بېچين؟

گوشنگي لام:



- بي بایوي ياده کېکالي آبي او تاتي حقبلايه بارايه کاو خط تانک کتابچايه کوچه لکن او اکالي دواس صنف کوچه پردن.

مهمنس حقي



هدف:

ياده كېكالي متنې بكار پرې او لكه بادن، تانك جامعاس وونا او رواجه
بارايه معلومات پيدا كن او مهمنس حقي پېندن.

- اېمه گوشنگې كودن مهمان اياگن؟
- مهمان نوازي كي آنتې كدن بگا؟
- اېمه تانك مهمان پلاكووات سلوك كېدا؟

افغاني جامعا كوچه مهمان او مهمانداري گڼى جاى دارگا. افغانان تل مهمنس عزتي كاگن او كومې گه گوشنگستا كوچه لېن بگاتې، وس پلا، تانك مهمان اوداى منع نه كيكن.

كه چودې كوتي پندارا او مسافر كوته گوشينگ شره برابر بې، تي آنتې به بو لوش مسكې دې اوو، چاى او ورگ دپيكن او وېله بسترستا غمي كاگن، مي خاترې هر مهمان يا مسافر گه كوتي گوشنگې گيك، مه گوشينگ كوچه چې تيس حقي بايكن. گوشنگوالي مهمنس پيكنستا جا، تيس اېك، پيكن او چيلاينا اونجكستا مسووليتي تانك شره گورپيكن او تيس چې مشكلستا حل كيكن، مقصد يو گه افغانان، مهمان نوازي كوچه نام درياگن. وريكن او زيب، گڼ او چنتي مهمنس عزتي كاگن او تي بيى بايكن.

متنس موټي مقصدي:

افغاني جامعاس وونا او روجي، مهمنس قدر او عزتي او تيس حقي شې.

فعاليټېلا:



- ياده كېكالي درسي دك دورېدې پردن.
- ياده كېكالي جملايه لړپكالا پلا اي جاى تكرار كدن.
- ۱- اېمه متن كوچاى كاو مترادف كلما تانك كتابچايه كوچه لكدا:

اکوړې لغتېلاینا معنی کتاب فهرست کوچه لشد او جملایه کوچه اچدا.

- کودن - قدر - بی



۲- اکوړې اوکتې جواب ددا.

- درس کو بارایه شی؟
- افغاني جامعا کوچه مهمان کو رقم جای دارگا؟
- کودن گه نارینا گوشینگ نه تیاگن افغاننا مادی مهمان پلا کو رکم چلند کاگن؟
- مهمان کیس دوستي آس؟

اکوړې عام او خاص نامبلایه پبندا:

حجرا، دیرا، افغانستان، مهمان، اوو، خدمت، کابل، فریده، تحفا
پانی، چیل، گن، چنتا، غیاب، قدر، غزت، احمد.

۳- اکت کدا:



صنف له دلایه شره وnten بن.
اول دلا مهمان شره اکت کن، دومنگل دلا مهماندار شره او لمنگل
دلا افغاننا وونا او رواج شره اکت کن.

۴- خالي جايلايه مناسب کلمايه دې تانک کتابچايه کوچه پوردا.

- افغاني کوچه گني جای
دارگا.

- تل مهمنس او کومي گه کوچه لېن
بگاتې تانک اودای
..... نه کېکن.

ارزيابي:

- آیا ياده کېکالي متن بکار پره بېچان؟
- آیا ياده کېکالي متنس املیي بکار خطېدې لکه بېکن؟
- آیا ياده کېکالي مهمنس حقېنستا بارايه اگت کده بېچين؟

گوشنگې لام:



بي بايوي ياده کېکالي! که چودې اېمه گوشنگې مهمان اې، اېمه
ملتنې کووات سلوک کېدا؟ مه اگته موتي کېو تانک کتابچايه کوچه
لکدا او اکالي دواس صنف کوچه پردا.

شت کډيک او لار انيک



هدف:

متنس بکارپریک، لکيک اوياده کېکالي شت کدکس فايديى او لار انکس نقصني پېندن.

– شت کډيک خول بکار شي؟

– لار انکې دې خول بنډا بې اعتبار بگا؟

– آيا اېمه چېکه شت کډېدا؟

شت او لار انيک دو متضاد عمل او اي ورې مقابله شن. مسلمانان شت کډکې دې الله ﷻ س لطف او مهرباني استه اچيکن او لار انکې دې الله ﷻ س غضب او قار پلا دورندور بياگن.

مي دې اورپا گه شت کدکې دې الله ﷻ راضي بگا، خلکه منجه به اي صادق او پاک انسان نامېدې شهرت پيدا کيا او قدر او عزتس خاوندې بگا.

لاړ انکالا، خلکه منجه اي بې باور او بې اعتماد شخص نامېدې پېنن بگا او کوته لمې کوچه به کمې شريی باور نه کاگن. شت کدیک او لاړ نه انیک اوسه عادت شي گه چنټه گيرې دې انسان کوچه پيدا بگا. يو بو عوامل دارا، که چودې آبي بيا او لړپکالي مه موضوع آنتې متوجې نه بن او بالکول مچ عادت شره اېلن، گر چې عمر کوچه ته عادت اودای نه ژنگياگن، درکار شي مه عادت اودای تېنا پوره درېن بې او بالکول پرجېوېن بن گه لاړ انیک مېنا دنيا او آخرت آنتې کاو ضرر پوليا.

هر دنه کوشش بې گه بالکولنا ذهني مه اشتباه اودای پاک بې، مي خاترې کېتا نه بېمان گه کوتي اگتې بالکوله شره زورېدې قبول کوېمان. خو کودن گه بالکول مي شره مولان گه يو لام تېنې ضرر دارا، کوشش کاگن گه تکرارستا اودای جانه دور رشدن.

يه بارايه بالکوله شره مسخرا مه بې، مي خاترې تېنا روحيي کمزور او منجای پيا او کودن گه عقدا گورېکن، کوشش کاگن گه بو لاړ ان. شت کدکالي انسانان چې جامعاس اعتمادې استه اچيکن او لاړ انکالېنا هيچ کوته اگت شره به کمې باور او اعتماد نه کاگن.

متنس موټي مقصدي:

شت کډیک بکار عمل شې، کمې گه شت کډا خلکه منجه اعتباري بو بگا او کمې گه لاړ انا، تانک شخصيتي استای دېبی، کمې به تي اگته شره يقين او باور نه کاگن او تانک محیط او اجتماع کوچه پیکا بگا.

فعالیتېلا:

- ۱- ياده کېکالي متني دککه پردن.
- ياده کېکالي متني ونښتان زور کنېدې پردن.
- ياده کېکالي متنس مشکل لغته اي ورې پلا اکټو پردن او اي ورېس غلطيا درېدن.

امه لغتنا معانستا کتاب فهرست کوچه لادا او جملایه یتېدا:



(۱) شت (۲) لاړ (۳) راضي



۲- اوکتني جواب ددا:

- خلک شت کډکالا او که لاړ انکالای بيې بايکن؟
- شت کډکالا خول خلکه منجه اعتبار دارا؟
- آیا کمې گه لاړ انگاتي سه صحيح مولوبن بيې يا شري قار او مسخرا بيې؟
- قار او مسخرا خول منفي اثر کېگا؟

۳- یاده کېکالي تانک منجه کدچال بن:



— یاده کېکالي تانک منجه کدچال بن او شت کدکس بکارستا کددن.

— یاده کېکالي کدچال بن او لار انکس مچارستا کددن.

— یاده کېکالي کدن گه کوته لار انکالای پښکښ؟

— یاده کېکالي کدن گه خلک خول شت کدکالا اگته شره یقین کاگن.

۴- یاده کېکالي تانک کتابچایه کوچه لکدن:



— یاده کېکالي اي وري آنتې متن کوچای کاو جملا املا کدن او اي ورېس املستا اصلاح کدن.

— یاده کېکالي دو ډلا بن، اي ډلا شت کدنا او وري ډلا لار بارايه کاو جملا کتابچایه کوچه لکن.

— هر کوته ډلاس اي اي جني صنف پوره لکنستا پردن.

ارزیابی:

— آیا یاده کېکالي متني بکار پره بېکښ؟

— آیا یاده کېکالي متني بکار خطېدې لکه بېکښ؟

— آیا یاده کېکالي شت کدیک فايدا او لار انیک نقصان بارايه اگت کده بېچين؟

گوشنگې لّام:



بيى بايوي ياده كېكالي كاو جملا لار او كاو جملا شت كديك
بارايه كتابچايه كوچه لکن او اكالي دواس صنف كوچه پردن.

جنگله اودای سم نیا گورېک



هدف:

ياده کېکالي تانک وطن جنگل ننگا کېک بارايه فکر کن، جنگلنا اهميت او ارزشي پېندن او متني بکار پرې او لکه بادن.

- جنگل خول ملي سرمايا نامېدي اوچېن بگا؟

- جنگلېلا اقتصاد کوچه کو رول دارياگن؟

- اما جنگلن کوتي مېوا دارکالي موټ دارياگن؟

جنگل اما گني ملي سرمايان حساب بگا. کوته دنه گه جنگلاته پلا

غلط سلوک اودای لّام گورېن بې، حقيقت کوچه وطن او خلکه پلا

غلط سلوک بوا شي.

افغانستان شرق، جنوب او شمال کوچه بو جنگل دارا. مه جنگل مېوا او بې مېوا موته اودای منجه ايوي شن او امه زندگي آنتې قسم قسم فايدا پولياگن. کودن گه مه جنگلې بې پامي بې، حق او نا حق کرېک انن بن، چې فايدا منجای پېگا.

جنگله دې وطنس آب او هاوېی تصفيا بگا او زندگيس بو بکار محيطي منجېکه اچي. مه جنگله کوچه برا، پارېک او گا ورلېن بياگن او سسوي لورکه اودای تشانيس بو ضرورتي شره پولياگن.

امه وطنس جنگلي بو مېوا والا موټ، اخول پستا، جلغوزا، کویت، سبر او وري بو قسم موته اودای جپوي شن گه هر ساله صادراتنا بو گن ونهستا جوپيکن. مي خاترې جنگلنا ننگا کپکي او تي اودای سم نپا گورېک اما وظيفا او ملي وجيان شي. کمې به حق نه دارا گه جنگلس اليني موټنستا کتېدن. کوتي موټ گه مه جنگله کوچه بو ساله دې منا گن بټينچ، که تې بېخ آنتې ارا مچېمان او کټمان، بو ساله کوچه امکان نه دارا گه وري موټياليک مېنا جايستا درېدن.

که چودې کوته دليلي دې کوتي موټ جنگلي انن بگاتې، بايد تي جايه وري موټياليک آنچن بې، که يو لام عملي نه بې، بو رون اما جنگلن نيست، نابود او منجای پياگن. کوتي لام گه کاو آخر ساله کوچه بټيک، جنگلنا بو گن ونټه منجای پټيک. ابت ضرور شي گه جنگلنا انکستا پوره درېمان او چې خلکنې، تي اودای سم نپا گورېکس پندستا لروېمان.

متنس موټي مقصدي :

امه وطنه بو جنگل موجود شن، جنگل وطن اقتصاد کوچه بو گڼي
اهميت دارياگن. جنگل کنه سنا (محيط زيست) آنتې بو فايدا
دارياگن. جنگلنا کټکي، چې فايدايه منجاي نېي. امه وطنې چې
خلک بايد جنگله بکار ننگا کډن گه وطنس گڼي سرمايي شي.

فعاليتېلا:



- ۱- ياده کېکالي متنې دککه پردن.
- ياده کېکالي متنې زور کښېدې پردن.
- ياده کېکالي متنې ونښتان پردن.
- ۲- اکورې لغتنا معنې کتاب فهرست کوچه لادا او جملايه يتېدا.

(۱) موټ (۲) نپا (۳) تشان



اوکتېلا:

- ۳- اېمه جنگله ارزش بارايه کو فکر دارېدا؟
- اي وطن آنتې جنگل کاو فايدا دارياگن؟
- که جنگل نه تن خلکني کو نقصان پولا؟
- خلک بايد جنگله پلا کو سلوک داراتن؟

۴- ياده کېکالي اکورې جملايه پردن او تانک منجه کدچال بن:



- ياده کېکالي تانک منجه مشورا کن او جنگله بارايه تانک نظرستا لږوېدن.

- ياده کېکالي جنگلنا نپي کددن.

- ياده کېکالي جنگلنا انکستا نقصني کددن.

- ياده کېکالي متنس مفهومستا موټي اوسادي جبېدې کددن.

۵- تانک کتابچايه کوچه لکدا:



- ياده کېکالي درسپس اول پرگرافي اي وري آنتې املا کدن.

- اي ورپس املستا غلطيا درېدن.

- ياده کېکالي اي لغت تانک خوشې دې انتخاب کن او جملايه يتېدن.

ارزيابي:

- آيا ياده کېکالي متنس املې لکه بېکن؟

- آيا ياده کېکالي متن بکار پرېه بېچان؟

- آيا ياده کېکالي جنگلنا اهميتي پېنکن؟

گوشنگې لام:



بي بيوي ياده کېکالي که وري کوتي موټنا نامه يادي تن، تانک کتابچايه کوچه لکن او اکالي دواس صنف کوچه پردن.

ٽوڪ



هدف:

- يادہ کٻڪالي مولان گه ٽوڪ ڪڍڪي دٻي ازنا ايا، ازنا صحت شره بڪار اثر دارا او متنس بڪار پريڪ او لڪيڪ شي.
- ٽوڪ کيس بيبي اورياگن؟
- خلڪ ٽوڪ ڪو خاتري ڪڍياگن؟
- اٻما ڪوتي ٽوڪ يادو شي؟

اي سادا او اپرن آدمي بهلول گوشينگ پلا همسايا آييك.
 اي دواس مه آدمي آنتې خط اېچ. کووات گه يو آدمي سواد نه
 داراييك. خط بهلول آنتې پريک خاترې نېچان او کدکن:
 ياشيخ! دو خواهش دارياگم؛ اول يو گه خطې پره تا دېم، دو منگل
 يو گه خط محرم شي، پريک دنه کرېنسي بند کيا گه نه اړه يا.

متنس موټي مقصدي:

آدمي سادا او بي سواد آييك. خط لکيک او پريک شره نه
 مولېگايک. بي سواډي مشکل خاترې خط پريک آنتې احتياج آييك
 او وري يو گه بو سادا آييك. سه مي شره نه مولېگايک گه کمې
 خط پرگاتې تيس کار بند کېک آنتې ضرورت نه شي، سه هر ورو
 اړيبي.

ياده کېکالېنا فعاليتېلې:

- ۱- ياده کېکالي متني دک دورېدې پردن.
- ياده کېکالي وار وارېدې متني اوبارا کېدې پردن.
- ياده کېکالي ټوکې پردن او موټا معنستا کددن.

۲- اکورې لغتنا معنی کتاب فهرست کوچه لادا او جملايه کوچه
یتبدا.

(۱) اپرن (۲) همسایا (۳) گوشینگ



۳- اکورې اوکتني جواب ددا:

- سادا آدمي خط خول بهلول آنتې پریک خاترې نېچان؟
- مه آدمیس گوشنگي کي گوشینگ پلا وکا آيیک؟
- یو آدمي شیخ اودای کو خواهش دارگاییک؟

۴- یاده کېکالي اکورې جملايه شره اکت کدن:



- یاده کېکالي ټوکې پردن او شری کدچال بن گه ټوک کو بارایه شې.
- یاده کېکالي دو ډلا شره ونتن بن. اي ډلا سواد اهمیت بارایه او وري ډلا بي سوادي ضرر بارایه تانک منجه مشورا کن او گر هر کوته ډلاس اي، اي یاده کېکالا صنف پوره نظرستا کددن.
- یاده کېکالېنا که کوتي وري ټوک یادی تن وارېدې صنف پوره تستن او ټوک کددن.

۵- کتابچایه کوچه لکدا:



- ياده کټکالي ټوکې کتاب روږدې تانک کتابچایه کوچه لکدن.
- ياده کټکالي متنې دو خط تانک خوشې دې اي وري آنتې املا کدن.
- ياده کټکالي اي ورېس املستا غلطيا سم کدن.
- ياده کټکالي (سواد) لغتي جملايه یتېدن.

ارزیابی:


- ياده کټکالي متن بکار پره بېچان؟
- ياده کټکالي متن بکار خطېدې لکه بېچان؟
- ياده کټکالي ټوکس مفهومي کده بېکن؟

گوشنگې لام:

بيى بايوي ياده کټکالي اي نونگي ټوک تانک کتابچایه کوچه لکن او وري دواس صنف کوچه پرېدن.

پنجي منگل پړان

امه لامپس کسبگري



هدف:

- متنس بکار پریک او لکیک، وطني کسبگرنا لمپنستا اهمیت او ارزشستا پینکي او تېنې گران انچېدې تاریک شې.
- دېوري کسب کوچه کوتي لام شره پولگا؟
- دېور کوتي توتایه وپیگاچدن؟
- اېمه کوته کوته کسبگره پینېدا؟

امه وطنه بو پوره زمانا دې منا مختلف کسبگر اخول:
تشان، آیینگر، چاینک او پیالا شره بتر ا نکالا، خاشخاش، پاچ دانا،
کونجد دانا اودای ابتدایی قسمېدې تیل کنکالا، ناور، دېور او وري لَام
کېگاینچ گه ایت به ایلاي جایه کوچه لَمه مصروف آین.
مه کسبگره کوچای ای دېور آس گه بو چیرې خلکنې لَام او خدمت
کیا.

پورا دېور ټوټا (پاواک) چادر او پتو وپیگاییک. بو خلک اودای چپلا
جوپیگاینچ او بو کم پیسایه دې خلکنا مشکلي حل بگاییک.
کورات گه ایت فابریکا بو بینچ او سدوري ټوټا تولید بینچ، دېورنا لَمه
به بند بیک.

دېوران ایت کپولا خادر او پشمي پتو جوپیگان. خلک مه پتویه بو
میناېدی گورپیکن او زمستنې شری ټپوا وټپیکن.

دېوري بو بکار کسب شې، می خاترې گه خلکنې ټوټا جوپیگان او ټپنا
مشکلستا حل کېیکن. خو ای اگت گه شری باید افسوس کمان یو شې
گه دېور کورات گه خلکنې گن خدمت کیا، خلکه منجه تخیل گن مقام
نه دارگا او خلک ټپنې بو اکورې مقام قایل بوی آین.

دېور او چې وري کسبگر احترامس وړي آین، می خاترې گه ته ای
کسبس خاوندني آین او مه کسب واسطایدې خلکنا مشکلي حل بگا.
می بجای گه خلک کسبگرنې کم آنچېدې نه تارن، درکار شې گه ټپنا

مقامي جامعا ڪوچه اوڀر ۽ او احترام آنچڊي لشدن. اخول حديث شريف
ڪوچه گه مڙهوا شي.
(الكاسب الحبيب الله) ڪسب گر الله ﷺ س دوستي آس.

متنس موٽي مقصدي:

ڪسبگر امه خلڪني بو با ارزش لام ڪاگن، او خلڪنا مشڪلي حل
ڪيڪن.
خلڪ بايد تڻي ڪم آنچڊي مه تارن او تڻي احترام ڦايل بن. خول
گه ڪسبگر الله ﷺ س دوستي آين.

فعاليتبلا:



- ۱- ياده ڪيڪالي متني ڊڪه ڀرڊن.
- ياده ڪيڪالي متني ونڻتان اوبارا ڪنڊي ڀرڊن.
- ياده ڪيڪالي مشڪل لغته ڀرڊن او معنا ڪڏن.
- ۲- اڪورڀي لغته معنا او گر جملايه ڪوچه يتڀڊا. لغتنا معيني ڪتاب
فهرست ڪوچه لاڊا.

(۱) ڊڀور (۲) ڇڀلا (۳) ڇيري



۳- اوڪتني جواب ڊڊا:

- ڪسبگر خول احترامس وڀي آين؟
- ڊڀور ڪو وڀيگا؟

- که کسبگر نه تنای کو بگاییک ؟

۴- یاده کېکالي کدچال بن:



- یاده کېکالي کدن گه دېور کورات کسبگر آس؟
- یاده کېکالي کدن گه دېور کو وپیگا؟
- یاده کېکالي دو ډلا بن، تانک منجه مشورا کن او دېور بارایه خلکنا بیې او مچ نظر بارایه اگت کدن.

۵- کتابچایه کوچه لکدا:



- یاده کېکالي اول پره گرافي کتاب روېدې تانک کتابچایه کوچه لکدن.
- یاده کېکالي امه جملای (دېوري بو بکار کسب شې، مي خاترې گه خلکنی ټوټا جوپیاگن) اي ورې آنتې املاکدن.
- اي ورېس املستا غلطیا درېدن.
- یاده کېکالي (پاواک) لغتې جملایه یتېدن.

ارزیابی:

- یاده کېکالي متن بکار پره بېچان؟
- یاده کېکالي متن بکار خطېدې لکه بېچان؟
- یاده کېکالي لامای کسبگرنا نامه کده بېچین؟



ياده کښکالي چې کسبگرنا نامه کتابچايه کوچه لکدن او وري دواس
تانک لږېکالا آنتې لروېدن.

مکرجن شیا لوکا



هدف:

ياده کېکالي پران مفهوم شره مولان، متنې بکار پرتا او لکتا بادن او متنې نونگي لغته ياده کدن.

– شیا لوکا کووات جناور آس؟

– شیا لوکا گوشنگي حيوان آس يا دشتای؟

– که شیا لوکا پوره کوتي کوربي يا بانگا ايک، کو سلوک ملتي کېگا؟

کدياگن گه اي مکرجن شیا ل اېرگاييک گه اي بې دفاع او بې ضرر گونگوشتهکې تانک مکر او فرېبي دې آنشېدن او ادن.

گونگوشتهک باغي کوچه گرگاچ او تانک جانستا مېوا او دانا يه دې سپر کېگاچ.

کودن گه شیاو کای گونگو شتک لشیچان، جانه دک درېکن،
 گونگوشتک بې خبر، میدې گه شیاو کای چل جیچان، شیاو کا آنتې
 وکا بچ، الې دنه شیاو کای چاپت کېکن او گونگوشتک دوره درېچان.
 بېچارا گونگوشتک حیران او وار خطا گه مه مکار او ظالم شیاو کا
 اودای کووات جانه یلا کدن.

گونگوشتکې تانک عقل اودای لّام گورېکن او شیاو کا آنتې کدکن:
 توگه یاو گن شکار کېکې، تېنه آنتې درکار شې گه الله ﷻ س شکري
 ادا کیا. بې عقل شیاو مه اگتېدې بلیک، دوره لوسېکن گه الله ﷻ س
 شکري ادا کدن، یه دنه گونگوشتک دوریا پرنګچ او اوباري موټ شره
 نېچ او شیاو کا آنتې کدکن: ته بو نا پرجوا شیاو کا آی گه نعمت لا
 اېوای نه شې او شکر کنگي.

متنس موټې مقصدي:

قصا مکرجن شیاو کا او بې ضرر گونگوشتک بارایه شې، مکر او حیلا
 کاو مچ شې، صداقت او بې ضرري کاو بکار لّام شې.



- ۱- یاده کېکالي درسي دک دورېدې پردن.
- یاده کېکالي درسېس جملینستا لړېکالا پلا اکتو تکرار کدن.
- اي ياده کېکالا شیاو کاس مکرستا بارایه اگت کدې.

- وري ياده کېکالا گونگوشتکس صداقت او تيس فکر کېک بارايه اگت کدې.

۲- مترادف کلمايه پېندا.

- حېلا، مکر، حېران، دريان، شيالوکا، گونگوشتک، شکر، منيک.
- دو حرف گه اوږ او اکوږ چېن بياگن (:) تېس معني کو شي؟
- کوتي کلما گه سواليا جوپياگن ته کلمايه پيدا کدا.



۳- اوکتېلا:

- شيالوکای خول تانک جانہ لوا وايويی ايک؟
- مکر جن شيالوکا درسي اودای اېمه کو مطلب گورېکو؟
- گونگوشتک کو رقمېدې شيالوکا دورې اودای پرنګچ؟
- نعمت اول اېن بگا يا شکر اول کنن بگا؟

۴- ياده کېکالي اگت کدن:



صنف دو ونټې شره ونټن بن.

اي ډلا شيالوکا او وري ډلا گونگوشتک بارايه اگت کدن او دويڼا بکار او ناکار خصوصيته بيان کدا.

۵- تانک کتابچایه کوچه لکدا:



صنف دو حصا شره ونټن بن.

اي ډلا شيا لوكا مكر او فرېب او وري ډلا گونگوشتكس عقل او تدبير بارايه، كاو خط تانك كتابچايه كوچه لكڼ. دويه ډلا تانك املستا تبادلا او تي اصلاح كډن.

ارزيابى:

- آيا ياده كېكالي متن پره بېچان؟
- آيا ياده كېكالي متن كوچاى مشكل لغتني جملا جوپي بېچين؟
- آيا ياده كېكالي گونگوشتك او شيا لوكاس قصيى تانك جبېدې

كده بېچان؟

گوشنگې لام:



- ياده كېكالېناكه كوتي وري قصا يادي تي، كتابچايه كوچه لكډن. كه چودې تانكي يادبي نه تي، گوشينگ ورې اوداى اوكت كې او ته قصاى تانك كتابچايه لكډن او وري دواس تانك همصنفيڼي اربوبډن.

متلېلا

هدف:

- ياده کېکالي متني بکار پړه او لکه بادن، متلنا معنا او مفهوم شره مولان او یتېکستا جایه پېندن.
- خول خلک اگته کوچه متل کدیاگن؟
- اېما متل خوشو آلیاگن؟
- اکورې متل کو بارایه شن؟
- ۱- وار تانک جایه گران شې.
- ۲- شورپینگ گه نه لشي نه غپکې.
- ۳- پورا پاته، خو پچبل به تاراته.
- ۴- پر کم جا، پر کي جام.
- ۵- پوي شرای اوريک، آسک شره نیک.
- ۶- مهمنس کو پورپی جا، کو عذري که.
- ۷- سېمه سات، سېمه مسلات.
- ۸- تال ته اوبارا، سانگ گه ککړا.
- ۹- تانک عملی، پنده یارنی.
- ۱۰- اړموروا دې انگ موروا بیی آس.

متنس موټي مقصدي:

متل شفاهي ادبياتس اي ونټه شې، گه هر كوته متلس يتېكستا جاي معلوم شې. خلك متله اي موضوعس اثبستنا خاتري كديكن.

ياده كېكالي فعاليتېلې:



- ۱- ياده كېكالي متله دك دورېدې پردن.
- ياده كېكالي متله ونټتان اوبارا كښېدې پردن.
- ياده كېكالي متله پردن او مفهومستا كدډن.
- ۲- ياده كېكالي اكوړې لغتنا معنيي كتاب فهرست كوچه لادن او جملايه يتېدن.

(۱) پچبل (۲) پريك (۳) سانگ

۳- ياده كېكالي سره كدچال بن:



- ياده كېكالي متله شره اگت كډن.
- ياده كېكالي اوته متل گه تانك آبي ببايه اوداي ياده كېچين، تي صنف كوچه مړېدن.
- ياده كېكالي تانك منجه متله بارايه مشورا كن او تي بارايه اگت كډن.

۴- ياده کېکالي تانک کتابچايه کوچه لکدن:



— ياده کېکالي کتاب کوچای چار متله تانک کتابچايه کوچه لکدن.

— ياده کېکالي دو متل تانک جانای کتابچايه کوچه لکن.

— ياده کېکالي اي متل اي وري آنتې املا کدن.

— ياده کېکالي اي ورېس املستا سم کدن.

ارزيابی:

— آیا ياده کېکالي متني بکار پړه بېکن؟

— آیا ياده کېکالي متنس املی لکه بېکن؟

— آیا ياده کېکالي متلنا یتېکستا جایه پېنه بېکن؟

— آیا ياده کېکالي کوتي نونگي متل کده بېچان؟

گوشنگې لّام:



بی بایوي ياده کېکالي دو نونگي متل تانک کتابچايه لکن او اکالي دواس صنف کوچه پړدن.

امه افغانان آيس



هدف:

- ياده كېكالي افغانيت او وطن يې باينيس روحيي جانې كوچه تقويا كدن، متنس مفهوم شره مولان، متني بكار خطېدې لكه او پره بادن.
- ۱- اېمه وطنس نامه كو شي؟
- ۲- كمې گه افغانسته زندگي كاگن ته كه آين؟
- ۳- كمې گه بېگانا نپايدې وطنه لام كيا، سه كو آس؟

افغانستان افغانننا وطني شې. هر کمې گه افغانستنې آس افغان آس. چې افغانان وظيفا داریاگان گه اکټو وطنستا آباد کدن او دشمنستا مقابلايه اي آست تستن. افغانننا مختلف نامه شره ونټکي، نفاق وېک دې اورټا وري کومې نه شې. که چودې افغانان قوم او قبيلايه، جبه او مذهب شره ونټن بن او هر کمې کېولا تانک قوم بارايه فکرکن، مي اودای اما دشمننن فايدا گورياگان او کوشش کاگان گه افغانه اي ورې پلا دشمن کدن. هر کمې گه افغانستننه هر قوم، قبيلا، جب، دين او مذهبه زندگي کيا، وطن پوره برابر او مشترک مسووليت دارا. ميسي خاترې چې اودای پورا امنې افغان بیک اساسي اهميت دارگا او تي پشکن وري شيلا. مي دې اورټا کېتا نه بېمان گه وري فکر کمان. کمې گه پرايا نپايه لام کيا، سه نه بيا کېتا گه جاني شره افغنس نامه جادن افغانننې درکار شې گه دشمن اگتنې کار نه جان، لېونگري او ايگري پندېدې تانک وطن ننگا کېک او آبادي بارايه فکر کن.

متنس موټي مقصدي:

افغانننا وطني افغانستان شې، هر افغان تانک وطن ننگا کېک بارايه مسووليت دارا گه تي آباد کېک کوچه کوشش کې او دشمن مقابلايه وطن اودای دفاع کې.



- ۱- ياده کېکالي متنې دککه پردن.
- ياده کېکالي متنې ونښتان اوړې اوزېدې پردن.
- ياده کېکالي متنس مشکل لغتي پردن.
- ياده کېکالي متنې پردن او مفهومستا سادي جېدې کددن.

۲- اکوړې لغتنا معنی کتاب فهرست کوچه لادا او جملايه يتېدا.

(۱) اکټو

(۲) کېولا

(۳) پرايا

۳- ياده کېکالي اي وړې پلا اگت کدن:



- ياده کېکالي افغاننه مسووليت بارايه اگت کدن.
- ياده کېکالي کدن گه افغانستنس ننگا کېکي خول بو ضرور شې؟
- ياده کېکالي دو ډلا بن، اي ډلا افغانننا دوستان او وري ډلا افغانننا دشمننه بارايه کدچال بن.

- ۴- افغاننه بارايه کاو خط تانک کتابچايه کوچه لکدا.
- ياده کېکالي متنس اي ونټه اي وري آنتې املا کدن.
- افغاننه بارايه اي موټا مقالا تانک کتابچايه لکن.
- ياده کېکالي (نپا) لغتې جملايه يتېدن.

ارزيابي:

- آيا ياده کېکالي متن بکار پره بېچان؟
- آيا ياده کېکالي متن بکار لکه بېچان؟
- ياده کېکالي متنس مشکل لغتې جملا جوپې بېچين؟
- آيا ياده کېکالي متن مفهوم شره مولېکن؟

گوشنگې لام:

ياده کېکالي متن ارتباطه موټا مقالا لکن او وري دواس صنف کوچه پردن.

اما وطنن



هدف:

ياده کېکالي متني بکار پره او لکه بادن، نونگي لغته ياده کدن، تانک وطني دارپلايه او ماله بارايه معلومات پيدا کن.

۱- داربلا کوچک اودای جوپوي شن؟

۲- اېمه گوشينگ آنتي وکا دار شن؟

۳- اېمه کودن داره کوچي لام خاتري پپوي آيدا؟

امه چې پېنېمان گه امه گران وطن کوچه بو دارېلا موجود شن، مه داره کوچه رقم رقم شيلينا كانه، قسم قسم موټنا جنگلي او دمنستا کوچه هر رقم بوټا او گانس موجود شې، گه وري فايدستا پلا اي فايدې يو شې گه بو رقم رقم مال كوچي تغذيا او وړياگن.

اما پشه يي قومن گه بويره دارېلايه دمنه کوچه زندگي دارياگن او تانك اقتصادستا مال او مالداري دې پورا نېكن، ټېنا ماله مېسه داره کوچه چرياگن او بوټا او گانستها اوداى تغذيا كاگن.

مه خلك گا، گولانگ، برتيك او چنگريك رشياگن، گولانگ اوداى سانگې قلوبا خاترې لّام گورياگن، گا او چنگريك گوشنگې شير دېكن. پوگال شير اوداى جغرات، شاپل، قروت او كړو جوپياگن گه هم تانكې كتخ خاترې اوداى لّام گورياگن او هم بو ونېستا بازاره لگنيكن او گوشنگستا بو مصرفستا الي پندېدې پورا كېكن.

چاروايه اوداى حاصل گورېك کوچه بو مادا رول دارياگن او بو لمېلا تې گراى تنظيم بياگن.

متنسی موټي مقصدي:

دارېلايه کوچه چارواينا ننگا كېكي، تې اوداى حاصل گورېك او تي شره روزمرا زندگيس پورا نېكي شې.

- ۱- ياده کېکالي درسي دک دورېدې پرېدن.
- ياده کېکالي نونگي جملايه لړېکالا پلا اي جاي تکرار کدن.
- ياده کېکالي متني اوبارا کېدې، وار، وارېدې پرېدن.

۲- اکورې لغتبلایه معنا او جملایه کوچه اچدا:

- گانس - گران - تغذیا



۳- اکورې اوکتني جواب ددا.

- درس کو بارایه شي؟
- چاروايه اودای کوتي محصول استه اېگا؟
- کوتي چاروا چیر دېگا؟
- اکورې له جملایه اودای اي جملای نشاني کدا او تانک کتابچایه کوچه لکدا.
- دار داره کالا، مهمان دېکالا، چاروا ننگا کېکالا.

اکورې متضاد کلمايه پېندا.

- ایک، ابت هوني، پېک، گن، چنتي، وېل، خوشال، پورهوني،
دواس، خپا

۴- ياده کېکالي شری اګت کدن:



ياده کېکالي له ډلايه شره ونټن بن، اي ډلا جنگلنا کړکنستا نامه گوردن.

وري ډلا گوشنگي مالنا نامه گوردن.

لمنګل ډلا کوتي حاصل گه گا او گولانګ اودای گورېن بگا نامه اوچېدن.

۵- تانک کتابچايه کوچه لکدا:



- ياده کېکالي درسېس اول له خطبلايه تانک کتابچايه کوچه بکارخطېدې لکدن.
- ياده کېکالي اي وري آنتې دو خط املا کدن، اي ورېس امليی اصلاح کدن.

ارزيابی:

- آيا ياده کېکالي متې بکار پرېه بېکن؟
- آيا ياده کېکالي متنس امليی لکه بېکن؟
- آيا ياده کېکالي امه وطنې حيوانتتا نامه گورې بېکن؟



- بو بېی بایوي او تکړي ياده کېکالې! کوتي چاروا گه اېمه
گوشینگ ننگا کېووان، نامه تانک کتابچایه کوچه لکدا او اکالي
دواس صنف کوچه پرېدا.

شاپل



هدف:

– ياده کپکالي شاپل جو پک شره مولان او تيس اقتصادي اهميتـستا درک کـدن.

متنې بکار پره، لکه بادن او نونگي کلمايه معنا شره مولان.

– شاپلس وري نامېلې کوتي شن؟

– شاپل کي اودای جو پېن بگا؟

– شاپل صحت آنتې کاو مفيد شي؟

شاپل اي قوي غذا شي گه امه وطنه مالدار خلک چير او دای، ابتدایي شکلېدې جو پېکن. کودن گه شیر گاېې اودای گورېکن، شیر گرم حالت کوچه ملتي، اوسه مایا گه پوراتي تيار او جپوا شي، تعين بوا اندازايه

کوچی وایکن او ظرفی ایکه گرم جایه جیکن. دو ساعت آپت شیر اخول جغرات کوی بجوا تگا، گر تي لم انگار شره جیکن او قاشق یا استبدې لم لم شاپلې ورگستا اودای جدا کیکن، کودن گه شاپل اکټو بیک، ایکه خاص چپرک یا جالي کوچه وایکن گه ورگي اودای پل بی. کودن گه ورگي اودای جدا بیک، چگي یا شېلر کې دې تلم تلم کیکن. لون شری وایاگن او اي يا دو دواس پتای شاپل ابک آنتې تیار بگا.

خلک مي خاترې گه شاپلې بو چیر ننگا کدن، لوپکوا ورگي کوچه بو لون وایاگن او ایکه گن چاتي یا کوتي وري ظرفی کوچه شاپلې کوچی وایکن، یو شاپل کاو مای، حتی اي سال جا به لوني واسطایدې بکار ننگا بگا. ایلاي خلک شاپل پلا تیس ورگي گه تي آنتې (شاپل ورگ) کدیاگن ایکن. امېمخول شاپل جوپېک گالایه گه کوتي ورگ اودای جدا بگا، تي آنتې (ایله پیت) کدیاگن گه سه به ابن بگا.

امه وطنه دورار منطقایه کوچه گه شاپل جو پېکس وسایلی موجود نه شن، خلک غیر فني او ابتدایي شکلېدې شاپل جوپیاگن او لوني زورېدې بو چیر ننگا کیکن، خو ابت شاره کوچه شاپل اساسي او فني طورېدې جوپین بگا. تي کوچه لون او وري مواد معین اندازیه واین بیاگن او مخصوص قوطني کوچه جای په جای کیکن گه بو دني جا بکار او استفاداس وړي تگا. شاپل آنتې ایلاي خلک، کرارک، لپا، ختک او میلان به کدیاگن.

متنس موټي مقصدي:

شاپل اي صحي غذا شي او امه وطني مالدار خلکنا اقتصادستا گڼ ونټه جوپيبي. خو ابت جا دوراڻي جايه کوچه شاپل غير فني طورېډي جوپين بگا او منظم بازار نه دارگا.

۱- ياده کيکالپنا فعاليتېلي:



- ياده کيکالي درسي دک دورېډي پردن.
- ياده کيکالي جملايه معلم صاحب پلا اکتو تکرار کدن.

۲- اکوړې لغتېلايه معنا او جملايه کوچه استعمال کدا:



- شاپل - ترم - ننگا



۳- اوکتني جواب ددا:

- درس کو بارايه شي؟
- شاپل کوچه لون خول بو واين بگا؟
- شاپل مالدار خلکه اقتصاد کوچه کاو رول دارگا؟
- آيا شاپل فني شکلېډي به جوپيگا؟
- خلک تانک شاپلستا بو دن ننگا کيک خاتري بايد کو کن؟
- امه وطن کوچه شاپل غير فني قسمېډي جوپين بگا او که فني شکلېډي؟

- کوتي شاپل بکار شاپل تگا؟

۵- اکت کدا:



اي صنف له دلایه شره وnten بدا.

اي دلا چیر شره اکت کدا.

وري دلا لونې شره اکت کدا.

لمنگل دلا وري کوتي مواد گه شاپل کوچه یتېن باگن اکت کدا.

۶- کتابچایه کوچه لکدا:



۱- خالي جایه مناسب کلمایه دې پوردا او تانک کتابچایه کوچه لکدا.

امه دورار کوچه گه وسایلي
موجود خلک او ابتدایي

شاپل او لونې بو ننگا کیکن
..... خو شاره شاپل طورېدې
..... بگا.

- متن کوچای دو جملا مشقي او بکار خطېدې لکدا.

- لکني تانک منجه اي ورې پلا تبادلا کدا او اي ورېس غلطیا
درېدا.

ارزیابی:

- آیا یادہ کٲکالی متن بکار پرہ بٲچان؟
- آیا یادہ کٲکالی متنس املیی سم کہ لککن؟
- آیا یادہ کٲکالی شاپلس جوٲکستا بارایہ اگت کدہ بٲچین؟

گوشنگی لام:



بی بایوی یادہ کٲکالی! اٲمہ اوتہ موادنا نامہ کتابچایہ کوچہ لکدا گہ
گایٲس شیرستا اودای جوٲین بیاگن.

گومانې



هدف:

- ياده كېكالي متنې بكار پرې او لكه بادن، نونگي كلمايه پېندن. طبيعت
- بارايه معلومات استه اچن او نباتات اهميت شره مولان.
- گومانې كي لشچين، كووات شكل داريانگن؟
- گومانې كوته فصله پيدا بياگن؟
- اېمه كودن گومانې اېوو شن؟

گومانې (زمين پې) اي بو فايدا داركالا نبات شې، گه انسانان اوداي هم
سسوي او هم تازي لام گورياگن، گومانې اكثر باره پيدا بياگن او خلك

تازي لديکن. کوته جايه کوچه گه بو پيدا بياگن، خلک سسلپکن او بو اوړې قيمتېدې لکنکن.

کورات گه گومانايڼا وري نامه سنگېس پې شې، اخول پې کوی قوي مواد دارگا او صحت آنتې بو فايدا پولېگا.

گومانې له قسم شن:

۱- اوته گومانې گه رنگه شامېک تگا، تېنې دېوانا گومانې کدياگن، مه قسم گومانايه خلک نه اېيکن.

۲- اوته گومانې گه رنگه شلېک رنگې آنتې وکا تگا او پتیی گن تياگن، ته گومانايه خلک هم تازي او هم سسوي پچلپکن.

۳- اوته گومانې گه بو اندازيدې داربلایه کوچه الېني بياگن، مه گوښي گومانې نامېدې به ياده بياگن.

له منگل قسم گومانې چې کوچه اصل او قيمتي گومانې شن.

گومانايڼا سوداگري، زيات مېسه گومانايه خوش کېيکن او بو زيات ملې دې گورييکن.

گومانې انوخل نبات شې گه ريشا نه دارگا، ورگې آنتې ياو ضرورتي نه شې او کاو دوسه کوچه سنگې اودای کنا نياگن.

گومانا اي مفيد نبات شي، امه وطنه بو پيدا بگا، خلک تي تازي او
سسوي لديکن، سسوي گومانايه خلک اوږي قيمتي دې لکنيکن.

۲- فعاليتبلا:



– ياده کپکالي متني دک دوربدي پردن.

– ياده کپکالي درسس نونگي جملايه معلم صاحب پلا اکتو تکرار
کدن.

– ياده کپکالي معلم صاحب پلا اکتو اوته جايلايه لشدن گه تي
کوچه گومانا يا زمينس پي پيدا بگا.



۳- اوکتني جواب ددا:

– گومانا کوتي موسم کوچه زمين اوداي نياگن؟

– گومانا کاو قسم شن؟

– گومانا کوتي جايه اليني بياگن؟

– گومانا نبات شي او که وري شي؟

۴- ياده کېکالي اگت کدن:



- صنف ياده کېکاليا له ډلايه شره ونن بن، هر ډلا اي اي رقم گومانايه شره جدا، جدا اگت کن.
- ياده کېکالي وري نباته بارايه تانک منجه مشورا کن او گر تانک نظرستا صنف پوره کددن.

۵- تانک کتابچايه کوچه لکدا:



- ياده کېکالي متنس چار خط اي وري انتې املا کدن.
 - ياده کېکالي اي ورېس املي اصلاح کدن.
 - ياده کېکالي اکورې لغته معنا او جملايه کوچه يتېدن:
- ۱- زمين پي ۲- اليني ۳- مل

ارزيابی:

- آيا ياده کېکالي متن صحيح پره بېچان؟
- آيا ياده کېکالي متنس امليي بکار لکه بېکن؟
- آيا ياده کېکالي گومانا پېنکن؟
- آيا ياده کېکالي گومانا فايدا بارايه اگت کده بېچين؟

کوشنگې لام:



- ياده کېکالي گومانايه بارايه تحقيق کن او اکالي دواس تانک معلومتستا صنف کوچه کددن.

بشړس گڼ خدمتگار



هدف:

- ياده كېكالېنا عالمنه او مولېكالي پلا آشنایي او تې لّمه اهميت شره مولېك، متنس نونگي لغتنا ياده كېكي، بكار خطېدې لكيك او پر كي شي.
- اېمه برقي پېنېدا؟
- برق اودای كوتي لّام گورېن بگا؟
- برقېدې زندگيس لّمه كاو آسان بياگن؟

علم الله ﷻ س گڼ نعمتي شي، که علم برکتې دې انسانان بو گڼ گڼ
مقامنې پولتينچ او تانک مولېني برکتې دې، انوخل بشر آنتې خدمتېلا
کيچين که چېکه انسانان اودای تمام عمر فايدا گورياگن اخول: راديو،
تلويزيون، ټايپ، تيلفون، مبايل، موټر، جهاز او وري، که مې کوچای بو
شيلاً برقه واسطايدې چالان بياگن، که برق نه تې، مه شيه اودای بالکل
لام گورېن نه بگا.

اوړې اوچېوي شيه دې اوړتا، برق اودای گوشنگ لوش کېک او
پچليک خاترې به لام گورېن بگا.
مي دې معلوم بگا که برق انسان زندگي کوچه بو رول دارا او بو شيلاً
برقي واسطايدې شره پولياگن.

امنې ضرور شي که وري گڼ گڼ عالمنه منجای اي عالم که برقي
کشف کېکې دې، خلکنې بو گڼ خدمت کيکن پېنمان، سه امريکايي
عالم (اډيسن) نام دارا که تانک مولېني او خدمتي دې خلکنا زندگيا
آرام کيچان.

مه عالمان کودن به منجای نه پياگن او مدام خلکه منجه زندي آين.

برق انسان زندگي ڪوچھ مهم شي، بو وسايل برقي دې شاپوي شن،
گوشينگ او شار برقي دې لوش شن.
(اڊيسن) گھ برقس جوپڪالي آس، خلڪني بو گني خدمتگار نامېدي
پپنن بوا آس.

ياده ڪپڪالي فعاليتبلي:



- ۱- ياده ڪپڪالي متني دڪ دورېدي پردن.
- ياده ڪپڪالي متني ونٽا اوبارا ڪنېدي پردن.
- ياده ڪپڪالي نونگي لغته پردن.
- ۲- بي بايوي ياده ڪپڪالي! اڪورې لغتنا معني ڪتاب آخر ونٽه لغته
فهرست ڪوچھ لاڊا او جملايه يتېدا.
(۱) لوش (۲) عالم (۳) مولېني
- ۳- ياده ڪپڪالي تانڪ منجه مشورا ڪن او عالمنه لْمه بارايه اگت
ڪدن.
- ياده ڪپڪالي مهم شيلا گھ عالمنه جويچين، ته شيلاينا نامه
گوردن.
- ياده ڪپڪالي ڪدن گھ برق ڪي جويچان؟
- ياده ڪپڪالي اي ورې پلا ڪدچال بن او برقس فايدي ڪدڊن.

۴- ياده کېکالي دو جملې تانک خوشې دې کتاب روږدې تانک کتابچایه کوچه لکن.

- ياده کېکالي متنس اوتې ونټستا اي وري آنتې املا مړېدن گه نن پروی شي.

- ياده کېکالي (برق) لغت آنتې جملې جوړېن.

- ياده کېکالي برق جوړېکالاس نامه تانک کتابچایه کوچه لکن او اي ورېس لکنستا سم کدن.

ارزیابی:

- آیا ياده کېکالي متني بکار پرېه بېکن؟

- آیا ياده کېکالي متنس املې سم لکه بېکن؟

- آیا ياده کېکالي برقېس وسایلنستا نامه گورې بېکن؟

- آیا ياده کېکالي برقېس کشف کېکالې پېکن؟

گوشنگې لام:

بی بایوي ياده کېکالي اوتې شینا نامه کتابچایه کوچه لکن گه برقې دې چالان بیاگن او اکالي دواس صنف کوچه پرېدن.

جرگا



هدف:

ياده كېكالي متنې بكار پره او لكه بادن، نونگي كلمايه ياده كې بادن او امه وطنس تاريخي او عنعنوي جرگايه پلا آشنايي پيدا كن.

- جرگا كي آنتې كدن بگا؟
- اېمه لامه كوتي مشكل، كودن جرگايدې حل بتيك؟
- آيا خلكه منجه مشكل خاترې جرگا بكار شن؟

امه وطنه جرگا پوره هونا وونا او رواج شې.
 امه وطنې خلک بو قومي، وطني، لامېس او گوشنگنا ډپنيا او جنجالې
 جرگايه دې حل او فصل کېيکن.
 کودن گه دولت کوچه کوتي گنې مشکل موجود تې، چې وطنې
 مولیکالي خلک مرکز کوچه لرو بياگن، کاو دواس اگت او بحث
 آپت، اي جلس پنده پيدا او مشکل حل بگا.
 امېمنخول که چودې کوله پوگاله يا قوم منجه کوتي ډپني تې، لي منطقا
 تې شلداران سره لرو بياگن او ته قومه يا پوگاله منجه خير اېرني کاگن
 او مسلاي حل کېيکن.
 جرگا کېکالي اوته خلکه کوچای انتخاب بياگن گه مولېکالي او
 تجرباوالا تن او دويه تلنه کوچه، کوتي بل به رابطا نه داراتن او بالکل
 بې طرف خلک تن.
 ته خلک دويه جانبه اودای اختياري گورييکن او انوخل قضاوت کاگن
 گه دويه جانبا تي کوچه خير او فايدي تې او هم جنجال او ډپنيا حل
 بې.
 خوشالي دې کده بېمان گه يو وونا کېولا افغانستان کوچه شې او وري
 وطنه کوچه ياو رواج نه دارگا.

متنس موټي مقصدي:

جرگا مولېکالي او شلدارنې اوتې پښې آنتې کډن بگا گه دو تلنه گرای
خیر او آرامي اېرن او خلکنا مشکلي حل کډن. جرگایه اوتې خلک
شرکت کاگن گه قوم او خلکه کوچه نفوذ او عزت داراتن او خلک
تېنا اگتنستا اودای وټتا نه بیاتن.

فعالیتبلا:



- ۱- یاده کېکالي متني دک دورېدې پردن.
- یاده کېکالي جملايه معلم صاحب پلا تکرار کډن.
- کاو جن یاده کېکالي جرگاس نقشي صنف کوچه ادا کډن او دو
جن گه تانک منجه دعوا داریاگن دو یاده کېکالي تینا نقشي
صنف کوچه تمثيل کډن.

۲- اکورې لغتبلایه معنا او جملايه کوچه استعمال کډا:



- وونا - شلداران - لرو



۳- اوکتني جواب دډا:

- درس کو بارایه شي؟
- جرگا کوتي وخت او کوتي حالت کوچه جوپین بگا؟
- ډپني او جنجلس حلستا پنډه کوتي شي؟

- کوتي جن جرگا کٻتا بياگن؟
- جرگا کي آنتي کڏن بگا؟
- امه وطن کوچه گڻ جرگا کڏنه جوپڻ بگا؟
- خلک ڊپني او جنجالي کي واسطايدې حل ڪيئن؟

۵- ٽانک منجه اگت کڏا:



ياده ڪٻڪالي دو ڊلايه کوچه جرگا بارايه اگت کن، مه دو ڊلايه اوداي اي، اي جن گروهه نمايندگي دې صنف پوره تستن او نظرستا کڏدن.

- ۶- مه متني ٽانک ڪتابچايه کوچه تڪميل کڏا.
- جرگا ڪٻڪالي اوت ته خلڪه اوداي انتخاب بياگن

- ته خلک دويه جانبه اوداي اختياري گوريڪن

..... جنجال او ڊپنيا حل بي.

- ياده کېکالي متن کوچای دو خط اي وري آنتې املا کدن او اي ورېس املیې اصلاح کدن.

ارزیابی:

- آیا ياده کېکالي متن بکار پره بېچان؟
- آیا ياده کېکالي متنس املیې بکار لکه بېکن؟
- آیا ياده کېکالي جرگاس اهميتي پېنکن؟
- آیا ياده کېکالي متنس مفهومي کده بېکن؟

گوشنگې لام:

- جرگا وطن او خلکني کو فايده دارا؟
- يو اوسه اوکت شي گه جوابستا پنج خطه کوچه تانک کتابچايه کوچه لکدا او اکالي دواس صنف پوره پردا.

وستو چارمنگل پٿر

وستل



هدف:

ياده ڪپڪالي مٽي پٿر او لڪه بادن، نونگي ڪلمايه ياده ڪدن.
وطني وونا او وستل پلا ايلن.

- وستل ڪي آنتي ڪدن بگا؟
- وستل ڪوچه خلڪ ڪو خاتري لڙو بياگن؟
- ايمه لامه يا منطقايه وستل شي؟

لامې منجای خلکنا لږو بکستا جای گه خلک تي کوچه جرگا او مرکا
کیاتن وستل کدن بگا.

وستل کوتي شخصي ملکیت نه، بلکې چې لامېس اکتو ملکيتي شي او
هر کمې کټابيا گه لږې تانک جرگا او مرکا خاترې لږو بن او
مشکلستا حل کدن.

وستل انوخل جای شي گه کوچی کاپ او فرش وېن نه بگا او
مخصوص واپ او لوړیک چوکي جایه وېوي شن او خلک دواسه شریي
نیاگن او تانک اگتېلایه کیکن.


پوره دنه کوچه گه خلکنا اقتصادي حالي بو نشوا تگایک، وستل بو
اهمیت دارگایک، خو ابت هر پوگال کوشش کیا گه تانک مهمنه
خاترې اي خاص دېرا یا حجرا جو پې او نېک او بحث خاترې اودای
لام گورې.

کورات گه افغانان مهمنې بی بایکن او اېریاگن گه تیس بکار قدر او
عزتي بې، مي خاترې خلکه وستل، دېرا او حجرايه شره بدل کېويا شن.
حجرا (مهمانخانا) کوچه خلک کاپ او فرش وایاگن او کودن گه
مهمان پیش بیک، تیار جایې وېوا تگا او مهماندار کوته مشکل پلا

دورندور نه بگا. گوشينگوالا کې بيا گه مهمنس بکار عزتي او قدري
کې او مهمنې خوشحالي دې رخصت کدن.

متنس موتي مقصدي:

ياده کېکالي وستلې پېندن، تي اودای لّام گورېک بارايه معلومات پيدا
کن، مي شره مولان گه دنې وتيک پلا وستل بجای خلک کي اودای
لّام گورياگن.



- ۱- ياده کېکالي درسي دک دورېدې پردن.
- ياده کېکالي جملايه معلم دې پتای پردن.
- ياده کېکالي متني نوبتي دې اوبارا آوزېدې پردن.
- ياده کېکالي مشکل لغته پردن او معني ياده کدن.
- ۲- اکورې لغتبلایه معنا او جملايه کوچه اچدا.
- وستل - دورندور - حجرا

۳- اکورې کلمايه کوچه مترادف کلمايه پېندا او تانک کتابچايه
کوچه لکدا.

جرگا، وستل، مرکا، سور، سانگ، زمستان، کاپ، وپېند، تغر،
ملکيت، اوچا.

کَلما: ڪا و حرفه اي جاي بيڪ اوداي اي کَلما منجپڪه ايگا گه سه
 اخول: و _ س _ ت _ ل هرکوتي حرف کهولا جاني آنتي کوتي
 معنا نه دارگا، اخول و، ل او وري.

سادا نام: گه اي مفرد کَلما تي او وري کومي نه دارگاتي اخول:
 ڪٽ، اس، انگار، شير، اڙ او وري.

مشتق نام: گه دو يا ڪا و کَلمايه اوداي جيوا تي اخول: شيرپور،
 شيرشاه او وري.

۴- اگت ڪدا:



- پورا خلڪ وستل ڪو خاتري جوپيگائينچ؟
- ايمه ڪوته جايه وستل لشيچو؟
- وستل ڪوچه خلڪ ڪوته لمبلايه شره پولپيڪن؟
- ياده ڪيڪالي وستلس فايدا او نقصان بارايه اگت ڪدن.
- ۵- اڪورپي جملايه ڪوچه اوتو کَلمايه پيدا ڪدا گه سوال جوپياگن
 او تي لپنه خط ڪندا!
- جرگا خول وستل ڪوچه جوپيگا؟
- آيا وستل ڪوتي شخصي ملڪيت شي؟
- وستل ڪوچه ڪي آنتي خلڪ فرش او ڪاٽ نه وياگن؟

۶- ياده کېکالي کتابچايه کوچه لکدن:



ياده کېکالي متنې چارخط اي وري آنتې املا کدن او اي ورپس املستا اصلاح کدن.

ياده کېکالي متن کوچای دو خط مشقي او سدوري خطېدې لکدن.

ارزيابی:

- ياده کېکالي متنې بکار پړه بېکن؟
- آیا ياده کېکالي متنس املې لکه بېکن؟
- آیا ياده کېکالي وستل بارايه اگت کدچين؟

گوشنگې لام:

ياده کېکالي تانک آبي او تاتي اودای تانک لامېس وستل بارايه معلومات گورن او اکالي دواس تانک معلوماتي همصنّفنه پلا اکتو کدن.

لغمان ولايت



هدف:

ياده کپکالي افغانستانس ولايتنستا پېندن، لغمان ولايت پلا آشنايي پيدا

کن، متېې بکار پرې او لکه بادن او نونگي کلمايه ياده کدن.

- لغمان ولايت افغانستانس کوته ونېستا کوچه چنوا شې؟

- لغمان ولايتس مرکزي کو نام دارا؟

- لغمان ولايت کوتي تاريخي جاي دارا؟

لغمان افغانستان ولايته کوچای، اي بکار ولايت شې. يو ولايت افغانستن سور آلك ونټه چنوا شې. مهم ولسوالېنا نامه اليشنگ، الينگار او مركزي مهترلام صاحب شې. لغمان مركز كوچه دو گني زيارت موجود شن گه ايكي آنتې مهترلام بابا او وري آنتې نورلام بابا كدياگن. پوره هوني خلكه اودای يو روايت شې گه مه دويه لېوني آينچ. لغمان ولايت كوچه تاريخي جايلو بو شن، خوامه مثال طوريدې كله گوش او سراج باغي ياده كېمان. يه ولايته خلك پشه يي، پښتو او دري جبه دې اگت كدياگن او خلكي بو مالداري او دهقاني شره مصروف آين. يه ولايته گوم، دزا، شال، ماش او قسم قسم تركاري كتن با. لغمان كوچه دو نندي گه اي اليشنگ او وري الينگار نندي نامېدې ياده بياگن او مه ولايتس بو سنگېنستا ورگ كيكن، شاريو شن. لغمان ولايت پورا لمپاكا، لمغان او لپگان نامېدې به ياده بوا شې. لغمان ولايتس خلكي مولېني او تعليمي بيى بايكن او كاو لېسا او مكتبېلا كوچي موجود شن.

متنس موټي مقصدي:

ياده كېكالي لغمان ولايت پلا آشنايي پيدا كن او تي تاريخي، فرهنگي، علمي او زراعتي لحظېدې پېندن.

فعالیتېلا:



- ۱- ياده کېکالي درسي دک دورېدې پردن.
- ياده کېکالي درسي معلم صاحب پلا اوبارا آوزېدې تکرار کدن.

۲- اکوړې لغته معنا او جملایه کوچه اچدا:



- سور آلک - بکار - مالداري
- اېلو علاما(،) جملاینا جدا کېکس نشانیا شي او نامه کاما شي.

۳- ياده کېکالي تانک منجه بحث کن:



- ياده کېکالي صنف کوچه له ډلا بن.
- اي ډلا لغمان ولايت معارف شره اگت کن.
- دو منگل ډلا لغمان ولايت زراعت او مالداري شره بحث کن.
- لمنگل ډلا لغمان تاريخي جايپلا او تيس زيارته شره کدچال بن.



۴- اکوړې اوکتنې جواب ددا:

- درس کو بارايه شي؟
- لغمان چودې چنوا شي؟
- لغمنس مرکزي نورلام صاحب شي او که مهترلام صاحب؟
- لغمان کوچه کوتي فصل بو بگا؟

۵- ياده کېکالي کتابچايه کوچه لکدن:



- ياده کېکالي درسېس اول له خط سدوري خطېدې کتابچايه کوچه لکدن.
- ياده کېکالي اي لغتې تانک خوشې دې انتخاب او جملايه يتېدن.
- ياده کېکالي متني دو خط اي وري آنتې املا کدن او اي ورېس املیسی اصلاح کدن.

ارزيابی:

- آیا ياده کېکالي متن صحيح پړه بېچان؟
- آیا ياده کېکالي متنس املیسی بکار لکه بېکن؟
- آیا ياده کېکالي لغمان ولايت بارايه کومې کده بېکن؟

گوشنگې لام:

ببي بايوي ياده کېکالي!
گوشينگ دشتا اودای معلومات کدا او لغمان ولايتس ولسوالېنا نامه
او افغانستنس وري کاو ولايتنا نامه تانک کتابچايه کوچه لکدا او
اکالي دواس صنف کوچه پردا.

رقعا

هدف:

– ياده كېكالي رقعا لکيكس اهميتي پېندن، تانک مکتب ادارا آنتې
رقعا بکار خطېدې لکه بان او متني پرېه بادن.

– کاو قسم رقعا لکه بېدا؟

– رقعا کو خاترې لکن بياگن؟

– که چودې کمې مريض تې او مکتبې رقعانه گرې، کو بگا؟

محترم () مکتبس آمرصاحب!

السلام عليكم و رحمت الله و برکاته!

محترما اه () () پولنه شه منگل

صنفس ياده كېكالا بو ناساز آم، تانک درسېلايني پولتا نه باگم، امېد

دارېم گه، اه تانک صنف حاضري کتاب کوچه ناساز باين بم.

بو مهربانيو تې

اېما شه منگل صنفس ياده كېكالا

(ياسين)

متنس موټي مقصدي:

رقعاس گړېکي مکتب آنتې خبر دېک شي گه ادارا او صنف تانک
ياده کېکالا اودای خبر تې.

فعالیتېلا:



- ۱- ياده کېکالي رقعای دک دورېدې پردن.
- ياده کېکالي جملايه معلم صاحب پلا اکتوتکرار کدن.
- ياده کېکالي متني وارېدی زور کنېدې پردن.



۲- اوکتېلا:

- رقعاً کو بارايه شي؟
- رقعاً گړېک مکتب آنتې کو فايده دارگا؟
- خدای مه کېکن که اېمه اودای کوتي ياده کېکالا ناساز بيک، سه
بايد تانک مکتبس آمرستا کو رقم خبر کدن؟

۳- اکورې لغتېلايه جملايه کوچه اچدا:



- ناساز
- ياده کېکالا



۴- اکورې او کتنې جواب ددا:

- ناساز ياده کېکالي مکتب آنتې خول رقعا گرپاگن؟
- ناساز ياده کېکالي گه مکتب آنتې رقعا گرپاگن تانک رقعستا کي شره تصديق او تائيد کېدن؟
- رقعا کو معنا دارگا؟
- ياده کېکالي گه مکتب آنتې رقعا گرپاگن، ميس فايدي او نپي کو

شي؟

۵- ياده کېکالي کدچال بن :



صنفس ياده کېکاليا دو حصايه شره وټن بن، اي ډلا رقعا گرپک بارايه او وري ډلا کوتي ياده کېکالي گه يه بارايه بې پروايي کياتن، اگت کدن او کدن گه مه دويه اودای کوتي لام بکار شي.

۷- کتابچايه کوچه لکدا:

صنف دو ډلايه شره وټن بن، اي ډلا ناسازيس رقيقي او وري ډلا رخصتيس رقيقي لکن او تانک معلم صاحب آنتې لروېدن.


ارزیابی:

- آیا یاده کټکالي متن بکار پره بېچان؟
- آیا یاده کټکالي متنس املی بکار خطېدې لکه بېکن؟
- آیا یاده کټکالي رقعاس اهميتي پېنکن؟
- آیا یاده کټکالي رقعا لکیک یاده بېکن؟

گوشنگې لام:

بېی بايوي یاده کټکالي، تانک مکتب نامېدې اي مريضې يا ضروري
رقعا لکن او اکالي دواس صنف کوچه پردن.

همسایاس حقي



هدف:

- متنس بکار پریک او لکیک، ایکه اجتماعس تکالپنا حقي او همسایاس حقي او تي پلا بکار سلوک کپکس پندستا پینکي شي.
- اسلام دين کوچه همسایا او تیس حقستا بارايه کووات امر بتيک؟
- امه کاو رقم همسایا داربمان؟
- همسایا کوته دنه اي ورې پلا سمرني کاگن؟

همسایا اي ورې شره بو حق داریاگن گه اسلام دین تیس ادا
کېکستا امري کېگا. همسایا حق شره تجاوز بو سنگین جزا دارگا.
دو گوشینگ گه وکا زندگی کاگن، همسایا نامېدې اوچېن بیاگن
گه باید زندگی چې مشکله کوچه اي ورې پلا کومک کن.
خوشحالي کوچه اي ورېس همیری بن او غریبي او تنگدستی کوچه
اي ورېس استه درېدن.

همسایا باید هر دنه اي ورې زندگی اوداي باخبر تن او کوشش کن
گه کودن به اي وري آنتې زحمت نه پوېن. بو جایه کوچه همسایا
لایې دې به پورا او رون مشکل آنتې پولیاگن. مي خاترې گه حادثا
بو رون او ناچاپ نازل بگا، کېولا همسایا وري همسایاس کومک
خاترې پوله بېگا. انگرششیک دنه، عاجل مریضی (خصوصا وېله)،
مالي او وري کومکېلا همسایایه گرای ممکن شې، لایکولي او تاتي
گه دوراې زندگی کاگن، مه عاجل مشکل آنتې پولتا نه بیاگن.

مي دې اوړتا امه وطن لنې پلا به همسایا دارېمان، کوتي اگت گه
گوشنگې همسایا حقې بارایه اوړې کدن بینچ، وطن بارایه به صدق
کاگن.

همسایا مملکت باید ای ورې لّمه کوچه مداخله نه کن او مشکله کوچه ای ورې پلا کومک او سمرني کن، کودن گه یو حق نظره درېن نه بې، همسایینا لّمه ډپني او جدل آنتې نېگا، مه همساییه منجه لفظي او نظامي ډپني ایا او دویه تلننې خطرناک تمام بگا.

متنس موټي مقصدي:

همسایا ای ورې شره بو حق داریاگن. ای همسایا باید وري همسایاس سخت دواس کوچه درکري بې، امه هم پوگال او هم وطن سطحه همسایا دارېمان. تېنې درکار شې گه ای ورېس داخلي لّمه کوچه آست اني مه کن.



یاده کېکالېنا فعالیتې:

- ۱- یاده کېکالي متنې دککه پردن.
- یاده کېکالي متنې ونډتان اوبارا کنېدې پردن.
- یاده کېکالي متنس مشکل لغتي پردن.
- ای یاده کېکالا متنې پردن او وري معنستا کدډن.



۲- اکوړې لغتنا معنی کتاب فهرست کوچه لادا او جملايه اچدا:

(۱) وکا

(۲) ډپني

(۳) دوراږ

۳- ياده کېکالي همسایا حق بارایه اگت کدن.

- ياده کېکالي بی همسایا بارایه اگت کدن.

- ياده کېکالي مچ همسایا بارایه اگت کدن.

- ياده کېکالي کدن که همسایایه پلا کووات سلوک داریاگن؟



۴- کتابچایه کوچه لکدا:

- متنس اي ونډستا اي وري آنتې املا کددا.

- همسایاس حقوقستا کتابچایه کوچه لکدا.

- ياده کېکالي اي لغتې تانک خوشې دې انتخاب او جملايه اچدن.

ارزیابی:

- آیا یادہ کٲکالی متن بکار پرہ بٲچان؟
- آیا یادہ کٲکالی متنس املیی سم لکھ بٲکن؟
- آیا یادہ کٲکالی متنس مفھوم شرہ مولٲکن؟
- آیا یادہ کٲکالی همسایاس حقی پٲکن؟

گوشنگی لام:



بی بیایوی یادہ کٲکالی همسایا حقوقہ بارایہ کاو خط لکن او اکالی
دواس صنف کوچہ پردن.

وستو اشته منگل پٻان

وطن



هدف:

- متنس بڪار پٻڪ او لڪڪ، نونگي ڪلماينا ياده ڪٻڪي او شعرس مفهومتا پٻنڪي شي.
- وطن ڪي شره بو گران شي؟
- اٻمه تانڪ وطن بارايه ڪاو معلومات داربدا؟
- امه وطنس نامه ڪو شي؟

ای مینې گېران وطنم
 ته پو آی شیر مردنا
 النې شیر اوباري تي
 که چاررای باتورنا
 مرچل آی اړودېنا
 او زانگو آی سربازنا
 تېنه نامه اودای قربان بم
 مینې سودري وطنم
 مینې گوشنگم، مینې گورم مینې تنم

محمد حسن حسام

متن موټي مقصدي:

شعر وطن بارايه کدوي شې، اما وطن افغانستان شې او يو وطن
 اړودېنا او باتورنا جايه شې.

فعاليتېلا:



۱- ياده کېکالي درسي دک دورېدې پردن.

- ياده کېکالي شعري معلم صاحب پلا اکتو تکرار کدن.



اوکتېلا:

۱- شعرکو بارايه کدوي شي؟

- شعرس شاعري که آس؟

- مه شعره کوچه کوتی کلما وزن جويياگن؟

۳- اکورې لغته معنا او جملایه کوچه استعمال کدا:



- شیراوباري

- چادر

- باتورنا



۴- اکورې اوکتني جواب ددا:

- مه شعرس عنوني کو شي؟

- وطن خول امه شره گران شي؟

- امه شره وطن کووات حق دارگا؟

۵- تانک منجه کدچال بدا:



بی بیایو یاده کېکالی! اوږې شعري تانک ډلا کوچه پرېدا او مفهومستا وار وارېدې کددا.

که چودې یاده کېکالېنا کوتي وري پشه یي شعر یادی تې، صنف کوچه پردن.

۶- تانک کتابچایه کوچه لکدا:



- یاده کېکالی تختا شره نوبتې دې شعرس اي، اي بیتستا لکدن.

- که چودې کوتي یاده کېکالا املایي غلطی تختاشره کې، وري جن تیس املستا اصلاح کدن.

ارزیابی:

- آیا یاده کېکالی متن بکار پرېه بېچان؟

- آیا یاده کېکالی متنس املی یاده که بېکن؟

- آیا یاده کېکالی شعر نشرشره پرېه بېچان؟

- آیا یاده کېکالی شعرس شاعري پېنکن؟

گوشنگې لام:



یاده کېکالېنا که چودې کوتي وري شعر پشه یي جېېدې یادی تن،

تانک کتابچایه کوچه لکدن او اکالی دواس صنف کوچه پردن.

الف

ابت = البه، حال، ابوت

اپرن = بې سواد

احتياج = اړ، تنگ آس، بېچاره

اعتبار = يقين

اكتيو = جمع، لړو، اي جای بېک

اليني = تازي، سرسبز

اوباري = اوړې، اوچت

اېله پیت = خام شاپل ورگ

آشکار = تارپا

ب

باتورنا = اړودې نا

برکت = بوبيک

بکار = خوب

بکوتي = چاق

بورېن = عمر اودای وېتوي

بهر = بکار، خوبتر

بيي = بکار، خوب

بېگار = جبري لّام يازورېدې لّام

ج

جبري = زورېدې

جن = پشه يي جبه کوچه انسان آنتې

مخاطب بگا

جوپېک = لنټېک، جوړکېک، سازکېک

د

دوراپ = دور، فاصلا

دورای = کنوالی

دورندور = مخامخ

دېنه يا دڼه = وخت يا وقت

دېور = ټوټا جوپېکالا، کسبا

ح

حجرا = مهمانخانه

حشر، انشر يا اشر = اکتیولام

چ

چادر = لنگوټا، پکړا

چاروا = مال، مواشي

چغزي = نرم

چنچا = پرنگیکالي

چوتېک = لړوکېک، جمع کېک

چېلا = میونس ازارخانه، لړمون او

اشکبانچه، پردا

چیر = وخت

چيلا = کالا، لباس

پ

پانیی = پزار، پا پوش

پېچل = یان، گر

پرایا = ورینا، وریکیس، بېگانا

پریک = شاپیک

پرک = استېس پرکي

پري = فکر، تامل، پام

پرېک = پرنا، ياده کېک

پگال = فامیل، گوشینگ

پندلرېک = رهبر، دشتا، گني، پرجوا

پوپا = منډ موړېکالا، دوکلونا،

دوورکونا

پوپرکونا = دڼه کونا يادڼه هونا

ت

تاڻا = آشڪار

تجارت = سواگري، دیک او گوريک

تجربا = اي شي اس ثبوت پولیک،

معلومات داريک

تحفا = سوغات

تڙم = شیر گرم

تشان = دروزگر، ال، جوتي، دروازينا

جوپيڪالا

تغذيا = خوراک، اڀک

توش = گومه اودای دروا گيا

س

سانگ = زمين

ستويک = ستايش، صفت

سچا = پاک

سمڙني = کومک

سور آک = شرق

ش

شاپل = ميلان، کبرارک

شت = درست مريک، راست گویی

شدال = يخ

شلدان = شليک داري والا خلک

شيراواری = اوڙي شیر

ع

عادل = با انصاف

عالم = دانا، پرجوا

ق

قدر = عزت

قيمت بها = قيمت دارکالا، بارزش

ک

کادان = بوسار، تشيس جايه

کتا = کم ورگيس شارکستا جايه

کله = غلا او داناس جايه (کال)

کنجړک = چنگړک، پارک

کنه سنا = محيط

کودن = کو وخت، کو گالا

کوراکوري = چارغاوک، يا چاربدې

شاريک

کېوا = اي عمل شرې آنتې پولوا

کېولا = جانېکو، تنها

گ

گال = پوچ کدنا

گالا = وخت

گانس = گيا، مالنا خوراکي

گران = بيی بايوي، عزيز

گوشينگ = بودوباش جايه

ل

لاږ = دروغ

لږو = جمع کېک، اکټو

لشدا = جمع آنتې امرشي، تاردا

لشوي = تاروي

لشي = مفرد کو امرشي، تاره

لنټا = جوپيک

لوش = جلکېکالا، صاف

لېنيا = اکوروالا

لهونكولي = اي اي او تاتي اودای پيدا

م

مالداري = چارواينا ننگا کېکي

مايا = اوتي مایع گه اي وري شی

منجېکواچتا بادن

مړېوي = وينا، کدنا مؤنث کلماکوچه

اېگا

مُل = قيمت

ممبر = جومات کوچه اممس تستکستا

جايه

منجولا = منجای، کوچه

موټ = اوچا دېکالا، لوړادېکالا اي

قسم گيا هم شې چارواينې کتن بگا،

کړک

مور = ورينج

مولېني = پرچیک، علم، دانش

مولپيا = دانا، پرجوا، عالم

ميلان = کراړک، شاپل

ن

ناساز = ناجوړ

نامدار = ناملا

نبت = جوړه اودای اونوا فرش

نپا = فايدا

نعمت = مزایا

ننډې = بو ورگ

ننگا = خوندي، پټ جیوا

نېلېن = نیک یا تستکس برعکسي

نياگن = کنانيانگن، کنانيک

و

وانټ = برخا، قسمت

واني = رول اداکېک، تقلید، واچ

وچېن = ياده کیک یا ياده بېنا

ورشوگنه = چارواينا چرېکس جايه

وستل = تصميم انشېکس جايه

وشامیک = راحت، آرامي

وشمیک = آرامي

وکا = نزدیک

ونتن = تقسيم

ونته = برخا، حصا

وونا = رواج

ډ

ډپني = جنگ او جدال

ډپېک = انجلېک، شورډېک

ډشپا = گن، قومس مشري، ملک

ډکان = انجلېک

ډ- راضي = قانع، رضائيت

ډ- زمېن پي = گومانپا، سمارق، بومبارا

ه

هاډي = غلا

هدف = مقصد

همسایا = گاوندې

هنچالي = جنگ، اي وريس انکي

ی - ياده کېکالا = شاگرد.